

文粹叢書

小說叢攷

下卷

商務印書館出版

小說叢考卷下目錄

玉簪記傳奇考

紅梅閣劇本考

冬青樹傳奇考

醉菩提院本考

拜月亭傳奇考

英烈演義考

儒林外史考

千鍾祿院本考(又名千忠戲)

十五貫院本考

全家慶傳奇考

玉蟾蜍彈詞考

野叟曝言考

游龍傳演義考

翡翠園院本考

一片石傳奇考(第二齣附)

三笑姻緣彈詞考(八美圖換空箱附)

鳴鳳記院本考

十美圖彈詞考

五彩輿劇本考

大紅袍彈詞考

一捧雪院本考

白蛇傳彈詞考

玉蜻蜓彈詞考(又名美蓉洲)

千里舟傳奇考

臨川夢傳奇考

療妒羹院本考

檣杌閒評考(一名明珠緣)

擲杯記傳奇考

鐵冠圖演義考

桃花扇傳奇考

小說叢考卷下

玉簪記傳奇考

玉簪記演應試書生潘必正因其姑寡居以後在女貞觀出家爲女道士。遂藉贖焉。而私與觀尼陳妙常勾情暗合。卒成夫婦。此事亦有所本。然潘生實名法成。非必正也。按古今女史云。南宋女貞觀尼陳妙常。年二十餘。姿色出羣。詩文俊雅。工音律。張于湖授臨江令時。宿女貞觀。見妙常。驚爲國色。以詩調之。而妙常亦以詞峻拒。後與于湖故人潘法成私通。兩情旣洽。潘以密告于湖。乞爲撮合。于湖乃以計斷爲夫婦。是于湖之功不在西廂杜將軍下。而傳奇但敘潘生一人。更不爲張姓起一脚色。不免失實矣。清上海縣閩秀趙儀姑作南宋宮閩百詠。而中有一絕句云。玉簪院本競傳鈔。暫借鸚鵡林作燕巢。難得于湖能不妒。締緣委曲爲心交。卽賦此也。

紅梅閣劇本考

紅梅閣演賈平章以愛妾鵬娘屬意某書生。因殺其妾。留書生於家。命僕賊之。賴鵬娘冥中力救得免。此實宋朝名媛賈娉娉事。按娉娉字雲華。錢塘人。父名平章。母莫夫人。與魏鵬母有指腹之約。鵬字高言。家貧。奉母命謁賈。賈命女結爲兄妹。不復議婚。鵬因侍婢春鴻。致辭於娉。私諧舊約。未幾。以母喪歸家。娉潛與生別。相持嗚咽。卒以鬱鬱病死。臨終。又遣春鴻致書魏生。書載名媛尺牘。下註其事甚詳。此事出於何書。編尺牘者惜未指出。爲可憾也。因錄其書如左。

賈雲華致魏高言書

妾薄命。不得奉侍左右。爲久遠計。今馬首欲東。無可相贖。手製粗鞋一雙。綾襪一緇。聊表微意。庶幾步履所至。猶妾之在足下也。悠悠心事。書不盡言。伏楮緘詞。涕淚交下。不宣。

然則平章之恨書生。實因悔婚起見。非挑其妾而使然也。劇本所云。亦失實矣。

冬青樹傳奇考

冬青樹爲鉛山蔣青容先生九種傳奇之一。此書惟夢報勘獄二齣。神道設教。不免空中樓閣。而其餘則皆紀實。書凡三十八齣。而列總目有四。曰謝太后晚年祝髮。趙王孫新國稱臣。文丞相燕臺殉節。謝招討古寺招魂。

按宋后妃傳。謝太后諱道清。天臺人。宰相深甫之孫。理宗寶慶三年。冊爲皇后。子度宗。孫帝昺。帝昺卽位。尊爲太皇太后。垂簾聽政。元兵薄皋亭山。駐錢塘。帝昺與母全后北去。太皇太后以疾留杭。至是年八月抵京。越七年而崩。全皇后會稽人。度宗立。冊爲皇后。生帝昺。後入燕京。爲尼正智寺而終。王昭儀名清惠。隨至燕京。度爲女道士。書中菴祭一齣。卽從此出。是祝髮係全太后事。而總目乃云謝太后者。恐係手民之誤。

趙孟頫字子昂。宋太祖子秦王德滂後也。幼聰敏。力學能文。至正中。程鉅夫以遺逸薦。世祖召見。神采煥發。命草詔。帝覽之喜曰。得朕心所欲言矣。仁宗朝拜翰林學士。稱其博學多聞。以李白蘇軾比之。尋請南歸。卒。追封魏國公。諡文敏。所著詩

文。清邃奇逸。篆籀分隸。真行草書。無不冠絕古今。遂以書名天下。其畫山水人物。尤精緻。子雍奕並以書名。事見元史本傳。又書史會要補云。頴妻管氏。善辭章。亦能書畫。仁宗嘗取其書。合頴雍書裝成一帙。藏祕書監。曰。使後世知我朝有一家夫婦父子皆善書者。管夫人爲我邑小蒸人。見青浦縣志。他書之紀載夫人書畫者。多不勝載。傳奇天聖寺畫壁一齣。殆非妄言也。

文天祥字宋瑞。號文山。吉水人。年二十舉進士。對策第一。帝異朝拜右相。加少保。封信國公。傳奇所編勤王留營急遁航海開府轉戰崖山抗節浩歌小樓柴市歸櫬諸齣。均依宋史本傳。及趙弼所撰文信公傳。傳長不能備載。姑置勿錄。惟遇婢一齣。則采他書以附合之者。按帝京景物略云。文山殉國。江南十義士舁公之屍。藁葬於都城小南門外五里道旁。元大德二年。文山繼子陞至京。訪公屍骨。偶見順城門內石橋側織綾戶婦。乃公舊婢綠荷。綠荷爲語劉牢子。引陞至葬處。見有大小二塔。大塔旁豎小石碑。刻信國二字。遂以歸葬廬陵。

王炎午生祭謝臯羽西臺兩齋。均見宋遺民錄。遺民錄云。謝翱字臯羽。長溪人。文天祥開府延平時。署參軍。已復別去。宋亡。天祥被執以死。翱不能禁。乃挾酒登子陵臺。設天祥主。跪拜號痛。取竹如意擊石。作楚些歌招之。歌闕。竹石俱碎。因作西臺慟哭記。又云。太學生廬陵王炎午字鼎翁。作生祭文丞相文。歷陳其可死之義。又反覆古今死節之道。激昂奮發。千五百餘言。錄數十本。驛途山店。俱貼之。大意在速文丞相死國。文載正氣集中。余嘗見之。又有文山死後望祭文一篇。僅一百七十八字。自序云。相國再被執。予嘗爲文生祭之。而吉水張千載自燕山持丞相髮與齒歸。丞相旣得死矣。嗚呼痛哉。謹痛哭望奠。再致一言。此野哭一齋所從來也。張千載卽張毅甫。文山本傳。言其負天祥骸骨歸葬吉州。實則張所攜者僅髮與齒。其骸骨乃由文陞遇舊婢綠荷。而始得歸葬者也。

謝枋得字君直。號疊山。信州弋陽人。性好直言。以忠義自任。元兵東下。枋得知信州城破。乃變姓名。入建寧唐山中。麻衣躡屨。東向而哭。旣又賣卜建陽市。求卜者

惟取米及履。委以錢。謝不受。人稍識之。延爲弟子。講學。已而江南提學程文海（卽程鉅夫）薦之。枋得遺書辭却。後爲魏天佑強使北行。遂臥眠箚中。不食二十餘日不死。乃復茹菜果。病居憫忠寺。見壁間曹娥碑。泣曰。女子猶爾。我豈不汝若。留夢炎使醫進藥。怒曰。汝乃欲生我耶。終不食而卒。事具宋史本傳。又宋史列女傳云。枋得妻李氏。枋得兵敗。李氏攜二子匿貴溪山中。采草木而食。至元十四年就俘。顧二子曰。若幸生還。善事吾姑。吾不得終養矣。解裙帶自經獄中死。此賣卜却聘餓殉三齣。亦紀實也。

唐王植冬晝事。見陶宗儀輟耕錄。王字玉潛。會稽山陰人。宋亡後一年。有總江南浮屠者。曰楊璉真伽。（此從史譯。通鑑譯爲嘉木楊伽勒智。）帥徒役。頓蕭山。發趙氏諸陵寢。王聞之痛憤。亟貸家具。邀里中少年飲。酒酣。泫然出涕曰。我輩皆宋人。何忍陵骨暴露。請共瘞之。衆曰諾。一少年曰。茲義事也。然事發奈何。王曰。我籌之熟矣。今取他骨相易。誰復知者。乃乘夜收遺骸共瘞之。又於宋常朝殿掘冬

青一株。植於土堆之上。爲賦夢中詩四首。其一云。一杯自築珠邱土。雙匣親傳竺國經。只有春風知此意。年年杜宇哭冬青。又考鄭元祐林義士傳云。宋太學生林德暘。字景曦。號霽山。當楊總統發掘諸陵時。林故爲丐者。背竹蘿。持竹夾。鑄銀作小牌百十。取賄番僧曰。餘不敢望。得收高孝兩家骨足矣。僧左右之。果得高宗孝宗骨。爲兩函貯之。歸葬東嘉。賦夢中詩十首。其一與輟耕錄同。不知果誰所作。二人之事。實不相謀。而清容先生因其同志。乃於收骨之下。又編私葬一齣。以會合之。因其有夢中詩也。乃又編夢報一齣。此齣脫胎於牡丹亭中之冥判。全屬子虛。惟以見輪迴不爽而已。又發陵一齣。言妖僧楊璉真伽斷理宗頭爲飲器。此事見杜珪紀聞。亦不誣也。

題驛碎琴諸齣。見汪水雲詩集序。水雲先生汪元量。字大有。錢塘人。以善琴受知宋主。國亡。奉三宮留燕甚久。世祖嘗命奏琴。因賜爲黃冠。南歸時。瀛國公與宮人王昭儀清惠以下廿九人。分韻賦詩。以餞其行。又宋宮人送汪水雲詩序云。水雲

留金臺一紀。琴書相與無虛日。秋風天際。東書告行。此懷愴然。定知夜夢先過黃河也。瀛國公即宋帝昀。入元後受此封號。時已祝髮爲僧。寄語林和靖一首。稿係瀛國公詩。驛中題壁。太液芙蓉渾不似。舊時顏色一闌。亦稿係王清惠詞。有遺集可按也。

醉菩提院本考

醉菩提演南宋。顛僧道濟。以菩薩化身。爲佛門弟子。游戲三昧。假作顛狂。此實六朝時之南宋時人。而院本以爲趙氏之南宋者。誤也。按南史陶宏景傳。後附沙門寶誌事云。寶誌不知何許人。於宋泰始中見之。出入鍾山。往來都邑。年已五六十矣。宋齊之交。稍顯靈跡。被髮徒跣。語默不倫。或被錦袍飲啖。同於凡俗。恆以銅鏡剪刀鑷鬚。拄杖負之。好爲讖記。所謂誌公符是也。天監十二年卒。將死。忽移寺金剛像出置戶外。語人云。菩薩當去。旬日無疾而卒。先是琅琊王筠。至莊嚴寺。寶誌遇之。與交言。歡飲。至亡。勅令筠爲碑。蓋先覺也。其讖記流傳後世。多有散見於南

史各傳中者。如梁武紀。天監中寶誌有詩云。昔年三十八。今年八十三。四中復有四。城北火酣酣。帝命周捨記之。帝年三十八。尅建業。八十三同泰寺災。火起之日。乃四月十四也。其言皆驗。王僧辨傳。天監中寶誌有讖云。太歲龍。將無理。蕭經籍。草應死。餘人散。十八子。時人謂蕭氏當滅。李氏當興。遂有李洪雅起兵湘州。後爲僧辨所敗。徐陵傳。陵數歲。家人攜見寶誌。寶誌摩其頂曰。此天上石麒麟也。又梁書何敬容傳。寶誌謂敬容曰。君後必貴。終是何敗何耳。及爲相。恐何姓爲禍。抑沒宗族。無仕進者。後爲河東王譽發其陰私。遂及於禍。此何敗何之驗也。劉歊傳。寶誌遇歊於興皇寺。驚曰。隱居學道。清淨登佛。如是者三說。王筠傳。筠奉敕製開善寺寶誌大師碑文。詞甚麗逸。是誌公一生。足爲紀述者甚多。後人因之。演爲種種奇異之事。而誤其名爲道濟。且誤其時爲趙氏之南宋。於是西湖諸禪林。僞造種種靈跡。以惑鄉愚。實則濟公卽誌公之誤。無其人也。嘗見坊間又有皆大歡喜濟公傳兩書。亦言濟公神跡。此皆畫蛇添足而已。

拜月亭傳奇考

拜月亭傳奇。元進士王實甫著。爲南詞之冠。時稱北西廂。南拜月。二書爲一時瑜亮。所演爲金邦事。事無可考。惟嘉興沈德符顧曲雜言。有談拜月亭一則云。何元朗謂拜月亭勝琵琶記。而王弇州力爭以爲不然。此是王識見未到處。琵琶無論襲舊太多。與西廂同病。且其曲無一句可入絃索者。拜月則字字穩帖。與彈擱膠粘緊湊。蓋南詞全本可上絃索者。惟此耳。至於走兩錯認拜月諸折。俱問答往來。不用賓白。固爲高手。卽且兒髻雲堆小曲。摹擬闌秀嬌憨情態。活托逼真。琵琶嚼糠一折。描寫亦佳。終不及也。向與王房仲談此曲。渠亦謂乃翁（弇州卽房仲之父）持論未確。且云不特別詞之佳。卽如聶古陀滿爭遷都一折。俱是兩人胸臆見解。絕無奏疏套子。亦非今人所能。余深服其言。若西廂才華富贍。北曲未有能繼之者。終是肉勝於骨。所以讓拜月一頭地。元人以鄭馬關白爲四大家。而不及王實甫。有以也。拜月亭後小半。已爲俗工刪改。非復舊本矣。今細閱拜月以後。無

一詞可入選者。便知此語非謬。又云。往年癸巳。吳中諸公子習武。爲鑑所訐。謂諸公子且反。以其贈客詩有云。君實有心追季布。蓬門無我若朱家。爲謀反稿證。給事中趙完璧因據以上聞。時三相皆吳越人。恐上遂信。行撫按。會勘虛實。會朱已去任。有代爲解者曰。季布朱家一聯。乃拜月亭曲中陀滿興福投蔣世隆。蔣作此語答贈。非諸公子所創作者。因取坊間刻本證之。果然。獄始漸解。王房仲亦諸公子中一人也。今細閱新舊刻本。俱無此聯。豈大獄興時。恐其連累。併削去此二句耶。或曰。拜月亭初無是詩。特解紛者詭爲此說。以代聊城矢耳。豈其然乎。

沈公明人所言如是。是此書實不在西廂下也。惜入清以後。卽已失傳。藏書家雖有是本。又不肯出以公世。遂使詞家之崇拜王實甫者。但知其有西廂。而不知其有拜月。誠可慨也。但觀沈公所云。西廂讓拜月一頭地。鄭馬關白四大家不及王實甫數語。則彼亦認撰西廂者爲關漢卿。此後人所由聚訟也。

英烈演義考

英烈二字。相傳爲明將花雲而設。雲懷遠人。貌偉而黑。驍勇絕倫。駐守太平。陳友諒以舟師來寇。雲與元帥朱文遜知府許瑗院判王鼎結陣迎戰。文遜戰死。城陷。賊縛雲。雲奮身大呼。縛盡裂。起奪守者刀。殺五六人。罵曰。賊非吾主敵。盍趣降。賊怒碎其首。縛諸櫓。叢射之。罵賊不少變。至死聲猶壯。瑗鼎亦抗罵死。太祖卽位。追封雲東邱郡侯。方戰急。妻郗氏挈三歲兒。泣語家人曰。城破吾夫必死。吾義不獨存。然不可使花氏無後。若等善撫之。卽赴水死。侍兒孫氏。瘞畢。抱兒行。被掠至九江。孫氏夜投漁家。脫簪珥屬養之。及漢兵敗。孫氏復竊兒走。渡江。遇債軍奪舟。墮江中。浮斷木入葦。採蓮實哺兒。七日不死。夜半有老父雷老挈之行。逾年達太祖所。孫氏抱兒拜泣。太祖亦泣。置兒膝上曰。將種也。賜雷老衣。忽不見。賜兒名煒。累官水軍衛指揮僉事。贈郗氏貞烈夫人。事見明史本傳。演義因之。以其妻爲英雄。妻爲烈女。爲從龍諸將之冠。故名其書爲英烈云。

書叙朱太祖削平羣雄。伐元一統。事多紀實。從龍諸將。亦皆史有其人。並非杜撰。惟必指爲星宿下凡。則因漢光武時。嘗有繪象雲臺以應二十八宿之說。故亦點綴其事。以取悅後人耳目。實則無是理也。

元順帝之荒淫。史實載之。非演義故甚言之。以爲順帝罪也。史言右丞哈瑪爾進西番僧於帝。僧教帝行房中運氣之術。號延徹爾法。（又譯演撲兒。華言大喜樂也。）哈瑪爾妹婿集賢學士圖嚕特穆爾。又進僧結琳沁。（又譯伽璘真）善祕密法。（亦名雙修法）帝皆習之。詔以西番僧爲司徒。結琳沁爲大元國師。各取良家女三四人奉之。謂之供養。帝日從事於其法。廣取婦女。淫戲是樂。帝諸弟伊朗等十人。俱號伊納克。皆在帝前。相與褻狎。號所處室曰濟齊齊烏格依。（又譯皆節兀該。華言事事無礙也）羣僧出入禁中。無所禁止。醜穢外聞。皇太子深疾二僧所爲。未能去也。又以宮女十六人按舞。名十六天魔。戴象牙佛冠。身披纓絡大紅綃。各執嚙巴拉薩巴（又譯加巴刺）之器。每宮中讚佛。則按舞奏。宦官非受

祕密戒者。不得與觀。此則演義所述皆紀實也。

元季童謠。石人一隻眼。挑動黃河天下反。後至正十一年。托克托（一譯脫脫）命賈魯治河。果於黃陵崗得石人一眼。而汝穎之寇。乘時而起。此亦見於元史。非妄言。

朱太祖名元璋。字國瑞。先世家沛。再徙泗州。父世珍。徙濠之鍾離。母陳氏。生四子。元璋其季也。生之夕。紅光滿室。鄉里望見。驚以爲火。至則無有人。咸異之。至正四年。大饑疫。元璋父母兄相繼歿。時年十七。孤無所依。乃入濠寺爲僧。會盜賊並起。元璋謀避兵。卜去留皆不吉。乃入濠城。見郭子興。子興奇其貌。留爲親兵。妻以所撫宿州人馬公女。元將賈魯圍濠。元璋力拒之。圍解。因收里中兵得七百人。見諸帥無足與共事者。乃獨與濠人徐達湯和等南略定遠。計降驢牌寨民兵三千。東襲張知院於橫澗山。收卒三萬。道遇定遠人李善長。與語大悅。遂與攻陷滁州。後渡江克金陵。以次平定東南。移師北伐。凡十有五載。而帝業成焉。史載太祖事。

大略如此。演義稍加點綴。致謂微時有偷牛之說。此則齊東野語。未足信也。又吳郡陸粲庚已編云。仁祖（太祖父追尊仁祖）先家於泗。後徙濠梁。所居密邇一蘭若。與其主僧交頗厚。僧每飲服仁祖之純誠。一夕望其舍。火光燭天。嘆曰。朱公善人。天忍殃之乎。淵月而仁祖至。僧唁之。答曰。此夕婦生男。恐有觸污。故久不來踐佛地。初無回祿禍也。蓋男即高皇帝云。此蘭若疑即皇覺寺。演義謂其主僧名曇雲。不知何據。或爲所臆造。亦未可知。

鄱陽湖之戰。丁普郎頭已落水。仍持刀殺人。劉基引太祖躍過別舟。而坐舟被轟。皆實事之見於史者。不得以事涉怪妄。而疑爲烏有也。

中山武寧王徐達以長圍圍張士誠於蘇州。九月不克。或有獻計者曰。蘇城蓋龜形也。六處同攻。則愈堅耳。不若擇其一處急攻之。乃可破也。會士誠之親信李司徒者。密遣人至軍前納款。武寧乃攻閭門而入。不戮一人。時信國公常遇春以城久不破。怒。從葑門入。雖三歲小兒不免。武寧聞之。急使人捧令牌諭之曰。殺降者

斬。信國軍乃止。士誠母聞城破。操淮音語之曰。吾兒敗矣。吾往日道如何。士誠悉驅骨肉登齊雲樓。縱火焚之。已獨不死。曰。吾救一城人命。就縛。俘至都下。李司徒以鼓樂迎道。意謂必得重賞。太祖惡其不義。戮之。葑門至今以信國之入。入猶蕭然。閩門則民物繁庶如故也。此錄楊循吉吳中故語。今演義以獻計破龜形者爲劉基。非是。

余永麟北窗瑣言云。方國珍寧海人。長身巨目。力能制虎。適蔡亂頭倡亂。珍鳩家衆執亂頭。台州路兵官得亂頭賄。奏免焉。珍怒曰。得賊無功。爲賊獲免。賞罰如此。彼能爲賊。我不能爲賊耶。遂作亂。殺元將赤魯不花。朝廷不能制。降詔撫之。授浙江行省平章政事。遂據温台明三府。以明府爲巢穴。東連張士誠。南結陳有定。爲東南一巨鎮。太祖號令江左。珍不敢敵。遣使求降。太祖惡其反覆。遣信國公湯和討焉。珍入海。和追獲之。送建康。太祖問曰。國珍一向在那裏。珍曰。天下無道。乘桴浮於海。天下有道。束帶立於朝。太祖喜。授以都督僉事。卒於建康。太祖以温台明

三府民心未靖。使其從子明敏明徹爲總管。而二明反生煽惑。潛謀不軌。遂族之。演義敘方國珍事。不甚詳悉。故錄此以資參考。

太祖伐元受命。人見其逐胡種而興漢種。實則順帝已非胡種。乃趙匡胤十三世孫。陽襲元位。陰接宋統。太祖仍以漢伐漢而已。按宋遺民錄云。帝曩降元。封瀛國公。稍長。世祖妻以公主。世祖夜夢金龍繞殿柱。明日瀛國公來朝。正立所夢柱處。世祖陰欲除之。瀛國公懼。遂乞從釋。號合尊大師。權衡庚申帝大事記云。瀛國降後。爲僧白塔寺中。後徙甘州。有趙王憐之。贈以回回女。延祐七年四月十六日夜生男。明宗適過其地。見寺上有龍文五采。訪知其故。因求其子。並載其母歸。袁忠徹符臺外集云。瀛國學佛於土番。娶邁來的爲妻。（元史譯作邁來廸）有娠。適明宗逃於漠北。與瀛國善。索邁來的爲妻。遂生順帝。西湖志餘云。虞集在文宗時草詔。有曰。明宗在北之時。自謂非其子。及順帝立。捕集赴大都。以皮繩縛腰。以馬尾縫眼。既至。集以文宗親改詔稿呈上。遂得釋。時有人作十七字詩諷虞集云。自

謂非其子。如今作天子。傳語老蠻子。請死。庚申外史云。順帝時尙書高保哥奏文宗在時。謂陛下非明宗子。帝大怒。究當時作詔者。欲殺虞集馬祖常二人。二人呈上文宗御筆。托克托在旁曰。彼負天下名。後世只謂陛下殺此秀才。乃捨之。又余應撰合尊大師詩云。皇帝第十六飛龍。元朝降封瀛國公。元君詔君尙公主。時蒙賜宴明光宮。酒酣舒指爬金柱。化爲龍爪驚天容。侍臣獻謀將見除。公主夜泣沾酥胸。幸脫虎口走方外。易名合尊沙漠中。是時明宗在沙漠。締交合尊情頗濃。合尊之妻夜生子。明宗隔帳聞笙鏞。乞歸行營養爲嗣。皇考崩時年甫童。文宗降詔移南海。五年仍歸居九重。至今兒孫主沙漠。吁嗟宋德何其隆。以上皆野史所載。雖似未可盡信。然元史本紀。文宗至順元年。以順帝乳母夫言。明宗在日。自謂長子非己子。命翰林書其事於史館。明年復詔奎章閣學士虞集作詔。播告中外。順帝登極。以此事徹去。文宗主。詔曰。文宗私圖傳子。乃構邪言。謂朕非明宗子。虞集傳亦載此事。是順帝非明宗子。當時已徧人口。故文宗崩後。皇后布達實哩寧立。

明宗次寧宗。而不立順帝。迨寧宗夭而始立順帝。以野史所載。合之正史。暗相吻合。則順帝確爲趙宋子孫無疑矣。明黃溥閒中今古錄云。宋太祖建隆庚申受禪後。聞陳希夷只怕五更頭之言。恐有不軌之徒。竊發於五更之時。命宮中轉六更方擊鼓鳴鐘。殊不省更庚同音。至理宗景定元年。歷五庚申。又十七年宋亡。而希夷五更頭之說信矣。到元朝廷祐七年庚申而至正帝生。帝乃宋少帝趙昞子。我大明真入燕都遁去。當時人只呼庚申帝。後方號順帝。是宋祖命轉六更之言亦信。

太祖既都金陵。觀山川形勝。勢皆內輔。惟牛首山外向。乃特定其罪。杖之百下。發令府編置。自此牛首稅絲。獨隸太平收納。鍾山西南一岡。勢若飛走。每視卽與舊形不同。乃用銅釘數丈埋山中。築於城下。曰以城爲索以繫之。見七槍山人楊儀明良記。明良記又載高皇帝嘗欲食湯餅。光祿寺上供。治具不精。多所誅戮。因言往時入一山寺中。僧進湯餅甚佳。今竟不能致。馬后聞之。乃親治數盤極粗糲者。

獻。帝一時食盡。后問何如。帝曰佳甚。后曰。往入山寺。乃當困乏時。食物覺美。今富有四海。錦衣玉食。厭飫之餘。願以口腹枉害人命乎。遣使尋山寺僧問法。乃以嫩雞作粉。洩麪爲之。使復命。盡戮寺僧。則演義之紀此事。實有來歷。靈谷寺寶誌顯靈事。亦見明良記。

劉伯溫青田山得天書事。似甚荒誕。然亦未嘗無據。按楊夢羽（卽七槍山人楊儀）高坡異纂云。誠意伯劉基讀書青田山中。忽見石崖豁開。公棄手中書函趨之。聞有呵之者曰。此中毒惡。不可入也。公入不顧。其中別有天日。見石室方丈。周遭皆刻雲龍神鬼之文。後壁正中一方。白如瑩玉。刻二神人相向。手捧金字牌云。卯金刀。持石敲。公喜。引巨石撞裂之。得石函中書四卷。甫出。壁合如故。歸讀之。不能通其辭。乃多遊深山古剎。訪求異人。至一山室中。見老道士憑几讀書。公知爲隱君子。再拜懇請。道士舉手中書厚二寸許授公。約旬日能背記。乃可受教。公一夕記其半。道士歎曰。天才也。遂覽公壁中書。笑曰。此書本十二卷。以應十二月。分

上中下以應三才。此四卷特其粗者。應人事耳。乃閉門講論。凡七晝夜。遂窮其旨。公拜請益。道士笑曰。凡天人授受。因材而篤。力薄而任重。鮮不仆矣。昔子房孔明。並得其六。予得其八。子今得其四。亦足以澄清濁世矣。若夫窮神知化。出入有無。此天地之玄機。造化之至理。天固不輕畀人。人亦豈得輕相授受哉。遂別去。後公佐高皇帝定天下。間語及道士。驛召至闕。年八十餘矣。時方議建宮闕。道士爲圖以進。與青田鐵冠所圖悉合。帝欲留備顧問。道士不奉詔。放還山。不知所終。或謂道士卽九江黃楚望也。今演義以道士爲卽周顛。誤矣。吳陸榮庚已編亦載此事。演義所載鐵冠道人周顛張三丰張金箔冷謙諸異人。均有來歷。試一一考實之。鐵冠道人張景和者。江右方士也。太祖駐滁陽時。詣軍門言曰。天下殺亂。非命之主。未易安也。今其在明公乎。上問其說。曰。明公龍瞳鳳目。貴不可言。若神采渙發。如風掃陰翳。卽受命之日也。上奇之。留於幕下。屢從征伐。令望氣決休咎。言出必驗。鄱陽之戰。友諒中流矢死。軍皆未覺。道人望氣密奏曰。友諒死矣。然其下未知。

猶爲力戰。請爲文以祭。使死。囚持往哭之。則彼氣奪矣。從之。漢兵大潰。定鼎後。凡諸營建。必令道人相其地。大見信用。一日。無故自投大中橋水死。求其尸不獲。已而潼關守吏上奏云。某月日。鐵冠道人杖策出關。計之正投水日也。由是不復見云。錄吳郡陸欒庚巳編。

周顛自言建昌人。年十四。忽患心疾。持瓢乞食南昌府市。每新官至。必進謁曰。告太平。人習知之。不甚異也。高祖定南昌。顛謁於道旁。左右扶之去。既歸建業。顛又來。自言水不熱。水不溍。上厭之。命以巨缸覆之。東廬炬圍缸舉火。廬盡火滅。發缸視之。煙在缸底。若張綿狀。罔端坐凜然。終不能傷。乃令寄食蔣山寺。密令主僧絕其飲食。亦不饑。賜之食則復食。將征陳友諒。問之。作壯士揮戈狀。示必勝。因令從征。師抵小孤山。見江豚戲水中。言水怪見。損人多。帝惡之。命將士引棄湖口水。中不能溍。明日復至。求食於帝。食既。整裝行。自是不復見矣。後數年。帝偶不豫。天池寺赤脚僧至京求見。言天眼尊者及顛仙。從廬山竹林寺遣送藥來。帝視藥。一曰

溫良藥兩片。一曰溫良石一塊。令置金盒中。揩背上。帝如法服之。疾愈。大喜。御製賜赤脚僧詩。又御製周顛仙人傳。刻石匡廬白鹿昇仙臺。時洪武二十六年癸酉九月也。赤脚僧姓沈。湖口人。法名覺顯。後人廬山天池寺修道。事見高坡異纂。張三丰事。亦見高坡異纂。據言遼東懿州人。張仲安第五子。有仙術。所言時事悉驗。元末居寶雞金臺觀。忽留頌而逝。土民楊軛買棺斂之。臨窆復活。留小鼓一腔而去。入秦遊蜀。登武當山。時至襄鄧間。洪武二十四年。詔求之不得。永樂中。遣禮科給事胡濙等徧詣天下名山訪之。終不遇。天順三年。誥贈爲通微顯化真人。天順末。或隱或見。有親炙問以大道者。專以仁義勸人。事皆先見。後往來鶴鳴山。將半載。竟失所在。嘗遊揚州瓊花觀。題詩一律云。瑤枝玉樹屬仙家。未識人間有此花。清氣不霑凡雨露。高標猶帶古雲霞。歷年既久何曾老。舉世無雙莫漫誇。便欲載回天上去。擬從博望借仙槎。語意清曠。蓋自况也。此從懿州志舊傳錄出。而玉堂漫筆謂卽馮暹張仙人。號玄玄子。係天師之後。

高坡異纂又載冷謙事云。謙字啓敬。湖湘人。國初爲協律郎。郊廟樂章。多所撰定。謙有故人貧不能自存。知謙得異術。求濟於謙。謙曰。汝命薄。某處有贏金二錠。可以資助。但勿過取。過則我與汝皆不利也。乃於壁間畫一門。一鶴守之。令其人敲門。門忽自開。入其室。金銀爛然盈目。恣取以出。而不覺遺其引。他日內庫失金。守藏吏獲引以聞。執其人訊之。辭及謙。因併逮謙。謙至城門。謂逮者曰。吾死矣。安得少水以救吾渴。守者以瓶汲水與之。謙遽以足插瓶中。其身漸隱。守者懼罪。遂攜瓶至御前。上問之。輒於瓶中奏對。上曰。汝出。朕不殺汝。謙自言臣有罪不敢出。上怒碎其瓶。片片皆應。終不知所在。錄庫中金果餘二錠。

張金箔山西人。自幼多技。嘗以鄉人不善金箔。往學於杭。歸以授之。用此得名。嘗遇道人控龍下其家。同至深山。再拜請教。道人指庭中曰。此有丹在。子可取之。張周視無獲。曰。但見犬糞耳。道人乃歎曰。子無緣。且當留形住世耳。居月餘。願得道人底蘊。一日偶出散步。少回顧。惟空山而已。詢之人。乃在大同城外。張歸。不以道

名。猶來杭剝金。且至暮還。倏忽千里。時作戲術娛人。孝陵聞之。召至闕下試術。大悅。時正臘月。命開荷花。張索乾石蓮子。影撒池中。頃刻花開。滿池香艷。上爲暗喏。又剪紙爲一舫。置水。踏而登焉。鼓棹放歌。往來花叢中。倏忽失所在。而花亦無有矣。亟命索之。竟不可得。莫知其所終。

儒林外史考

是書爲全椒吳敏軒先生所著。先生名敬梓。晚自號文木老人。少負俊才。不可一世。性尤伉爽。踵告者知與不知。皆盡力爲之助。故二十年而家財罄矣。清雍正乙卯。舉博學鴻詞科。當事者以先生及其從兄青然先生應之。兩先生均堅臥不起。先生客金陵。愛其山水。遂家焉。四方文酒之士。推先生爲盟主。鳩同志。葺先賢祠於雨花山麓。祀泰伯以下。凡二百數十人。工鉅。售所居屋以成之。而家道由是益窘。至冬不能具爐炭。姻戚故舊。官中外者以千百計。卒不一往。惟閉門課子。賣文爲活。卒葬金陵鳳臺門之花田。然先生素以此舉自豪。故書中視祀泰伯祠爲最

緊要事。卒後遺一子名煥。字荀叔。號樹亭。以進士官中書。精天文算術音韻之學。阮文達公疇人傳。雲間沈學子學福齋集。及吾邑王述菴先生蒲褐山房詩話。均述及之。先生著書甚富。然皆奇數。嘗爲詩說七卷。是書爲嬉笑怒罵之文。其原本亦祇五十五卷。於琴棋書畫四士既畢。卽接沁園春一詞。以爲結束。不知何時。爲僉父妄增幽榜一卷。其詔表皆割先生文集。中駢語。襲積而成。狗尾續貂。不值識者一哂。是猶西廂水滸之卒爲俗手所壞者。同一遺憾也。

書借危素王冕二人引入。謂演明初時事。實則影射與先生同時之諸名士。細按之。可一一吻合也。書中杜少卿乃先生自况。杜慎卿卽指青然先生。其生平最敬服者。爲江寧府學教授吳蒙泉。故書中表爲上上人物。其次則上元程綿莊。全椒馮萃中。句容樊南仲。上元程文。皆與先生至交。書中所謂莊徵君者。程綿莊也。馬純上者。馮萃中也。遲衡山者。樊南仲也。武書者。程文也。他如平少保之爲年羹堯。鳳四老爺之爲甘鳳池。牛布衣之爲朱草衣。權勿用之爲是鏡。蕭雲仙之姓江。趙

醫生之姓宋。隋岑菴之姓楊。楊執中之姓湯。湯鎮臺之姓楊。匡超人之姓汪。荀攸之姓苟。嚴貢生之姓莊。高翰林之姓郭。余先生之姓金。萬中書之姓方。范進之姓陶。婁公子之爲浙江梁。或云桐城張。韋四老爺之姓韓。或象形諧聲。或度辭隱語。試以雍乾間諸家文集。紬繹而參稽之。往往十得八九。書中沈瓊枝。卽指隨園所稱之揚州女子。高青邱指戴名世。以其文字取禍。與青邱相似故也。此節非余臆度而得。乃見蘇州金和所誌如是。金母爲青然先生女孫。趨庭所聞。常更確於外人之所測度。余特依樣錄之而已。

王冕字元章。諸暨農家子。父使牧牛隴上。潛入塾聽村童誦讀。暮亡其牛。父怒撻之。塾師聞而憐之。願教之讀。不受值也。及長。應進士舉不第。焚所作文。讀古兵法。著高簷帽。被綠篋衣。履長齒木屐。擊木劍。或騎牛持漢書以讀。人咸目爲狂士。事母至孝。春秋佳日。輒以牛車奉母。口唱歌辭。遊山水間。盡樂而返。晚隱九里山。爲胡大海軍所獲。大海問攻越之策。冕曰。將軍能以仁義服人。何人不服。若以兵力。

浙人雖弱。恐亦義不受辱。大海奇而謝之。留諮軍事。太祖授以諮議參軍。明史有傳。朱竹垞曝書亭集。亦爲王冕作傳。與史略同。而無名氏保越錄。則謂冕在胡大海軍。嘗獻策攻越城。此必傳聞之誤。無是事也。外史第一回述王冕事均有來歷。以冕所爲。實開名士之習。故藉爲是書弁首耳。

危素字太樸。金溪人。少通五經。元至正間。授經筵檢討。修宋遼金三史。拜參知政事。以言事不報。棄官隱房山。明師抵燕。趨報恩寺入井。僧大梓挽之曰。國史非公莫知。公死是死國史也。素遂止。兵迫史庫。元實錄得無失。洪武二年。授翰林侍講學士。一日。帝坐東閣。聞履聲橐橐。問爲誰。對曰。老臣危素。帝曰。是爾耶。朕將謂文天祥耳。元朝老臣。何不赴和州看余闕廟去。遂謫和州。踰年死。見明史本傳。素於元季。嘗居燕京鐘樓街。冕嘗至燕。素騎過冕。冕揖之。不問名姓。忽曰。公非住鐘樓街者耶。此亦見朱集王冕傳。外史述王冕輕視危素。蓋不虛也。

是書於清光緒初年。有著稱天目山樵者。嘗加評而考實之。然則已有先余而爲

之者。余又何考焉。雖然。前刻之書。坊間已苦難得。余既尙有是書。敢不出以公世乎。因錄其所考者如左。

第十二回調侃權勿用。謂肚裏沒有通過。此係是鏡實情。按阮葵生茶餘客話云。江陰是鏡。詭詐妄誕人也。胸無點墨。好自矜飾。居之不疑。海寧陳相國爲其所惑。高東軒相國亦信之。尹健餘侍郎督學江左。因二公之言。造廬請謁。結布衣交。鏡遂闢書院。招生徒。與當時守令往還。冠蓋絡繹。常州守黃靜山永年亦與過從。其後因屬託公事。不復往還。因於書院靜室供陳高尹黃四木主。俗所謂長生祿位也。第十三回謂勿用誘拐尼姑獲案。亦有來歷。董潮東臯雜鈔云。澄江是鏡字仲明。託名講學。一時大老交章薦之。後爲胞弟告發三十餘款。常郡守宋楚望深惡之。毀其廬造書院。則此三十餘款中。安知不有奸拐案哉。

第十二回之假俠客張鐵臂。第十五回之假神仙洪愁仙。皆借前人說部中事以演之者。按太平廣記二百三十八引桂苑叢談云。張祐下第嗜酒。自稱豪俠。一夕

有人腰劍手囊。囊貯一物。血殷於外。入門曰。有讎人。恨十年。今夜獲之。此其首也。命酒飲之。曰。去此三四里有義士。欲報之。能假十萬緡。此後湯火無所憚。張傾其緡索與焉。留其囊而去。五鼓絕。蹤跡杳然。閉囊視之。乃豕首也。桂苑叢談又云。護軍李全皋遇道人通爐火事。求一鐵鼎。容五六升以上者。黃金二十餘兩爲母。日給水銀一物。火候既滿。開視。黃金爛然。李信之。三日之內。添換有徵。一日。道人。不來。啓藥鑪視之。不見金矣。是書婁公子所遇俠客。胡公子所遇神仙。事蓋出此。牛布衣指朱草衣。客死蕪湖。見江寧府志。府志云。朱卉字草衣。蕪湖人。依吉祥寺僧爲童子師。性喜吟詠。游他郡。訪諸名宿。與之講切。遂工今體。中歲僑居上元。無子。依一女以終。自營生壙清涼山下。余案隨園先生詩話云。白下布衣朱草衣。少時有破樓僧。打夕陽鐘句。因之得名。晚年無子。卒葬清涼山。余爲書清故詩人朱草衣之墓。勒石墳前。隨園又題朱草衣課女詩云。草衣山人四壁空。繞膝呻吟。惟一女。卽指此也。

第三十三回杜少卿夫婦遊姚園。姚園卽指袁簡齋之隨園。園不甚大。而此稱極大者。以隨園詩話中。曾自誇其大。故亦大之。所以調侃袁氏也。遲衡山指樊明徵。據江寧府志文苑傳云。明徵字聖謨。一字軫亭。句容人。博學精思。其於古人禮樂車服。皆考覈而制其器。有受教者。舉器以示之。不徒空言也。著書四十餘種。尤詳金石之學。

莊徵君指程綿莊。據袁簡齋小倉山房程綿莊墓志銘。稱乾隆丙辰召試。有欲招之出門下者。正色拒之。以此不入選。外史第三十五回事。卽由此出也。徵君姪莊濯江。疑卽指程魚門。

郭孝子爲外史中第一人。未知究指何人。偶見寶山李保泰齋生文集胡孝子尋親記後。附有歙縣胡仲長入閩尋親事云。仲長將赴閩。自念孱弱不能涉險阻。遇行脚僧伎勇絕倫。延至家。肄習經年。(中略)在閩中遇瞽者。漸與歡洽。告以故。瞽者故通於盜。常爲盜伺。曰。我故知爾父。爾父現使外洋未回。未幾歸。令孝子往見。

遂奉以歸。外史所述。與此相似。殆卽指其人而稍爲增飾者耶。夜中山行。倦睡巖下。有虎嗅之。虎鬚入鼻。噴嚏聲振。虎驚躍走。此事見朝野僉載。外史借爲郭孝子事。以見純孝之必獲天佑也。

丁辛老屋集卷十二。有書吳敏軒先生文木山房詩集後十絕句。其第八絕云。杜老維耽舊草堂。徵書一任鶴銜將。閒居日對鍾山坐。贏得儒林外史詳。卽賦此也。

千鍾祿院本考（又名千忠戮）

千鍾祿演明永樂篡位以後。屠戮忠良。窮搜建文蹤跡。故又名千忠戮。事多紀實。按資治通鑑。燕王棣發北平。僧道衍（卽姚廣孝）以孝孺爲囑曰。城下之口。彼必不降。幸勿殺之。殺孝孺。天下讀書種子絕矣。燕王領之。及陷京師。卽大索孝孺等五十餘人。鎮撫伍雲縛孝孺至。燕王以道衍言。顧左右收之曰。勿令遽死。及卽皇帝位。召草登極詔。孝孺悲慟。聲徹殿陛。帝降榻勞曰。先生無自苦。朕欲法周公輔成王耳。孝孺曰。成王安在。帝曰。彼自焚死。曰。何不立成王之子。帝曰。國賴長君。曰。

何不立成王之弟。帝曰。此朕家事。願左右授筆札。孝孺投筆於地。哭且罵。復強之。乃大書燕賊篡位四字。帝大怒。命繫獄。會齊秦黃子澄均爲所執。械至京。帝親詰之。抗辨不屈。遂命與孝孺同磔於市。孝孺慷慨就戮。賦絕命詞而死。詞曰。天降亂離兮。孰知其由。奸臣得計兮。謀國用猶。忠臣發憤兮。血淚交流。以此徇君兮。抑又何求。嗚呼哀哉。庶不我尤。其門人廖鏞廖銘檢遺骸。瘞聚寶門外山上。尋亦被逮。與胡子昭盧原質鄭公智林嘉猷鄭居貞俱坐死。秦從兄弟俱坐死。子澄族無少長皆斬。孝孺弟孝友亦死。妻鄭氏及二子中憲中愈先自經。二女投秦淮河。宗族親友及門下士坐誅者。廖鏞等外復數百人。又遜國名臣傳云。孝孺大書數字。投筆於地曰。死卽死。詔不可草。帝大怒曰。汝焉能遽死。朕當滅汝十族。紀事本末采其說。改作文皇帝大聲曰。汝獨不顧九族乎。孝孺曰。便十族奈我何。乃收門生廖鏞等爲一族並坐。然後詔磔孝孺於市。實則門下之誅。在孝孺見磔以後。十族之說。殆爲後人所附會。然劇本編入是說。亦未爲無據也。

史載景清緋衣行刺。磔市族誅。在永樂元年八月。距磔方孝孺時已兩月矣。而劇本演孝孺草詔之先。已見景清剝皮植草。蓋亦有故。按王鏊守溪筆記云。文皇帝至金川門。百官迎拜江次。清獨直立罵不已。帝命左右抉其齒。且抉且罵。含血直噴上衣。乃命醢之。罪及九族。久之。上晝寢。夢清入殿追之。帝曰。清猶能爲厲耶。乃籍其鄉。轉相攀染。謂之瓜蔓抄。據此則景清之死。果在孝孺前矣。惟劇本以抉齒爲孝孺事。則借入者也。

陳瑛潞人。建文時爲北平按察使。受燕府金錢。通密謀。事發。謫廣西。燕王卽位。召爲副都御史。瑛性殘忍。言廷臣効死建文者。如黃觀。廖昇輩。其心與叛逆等。遂簿諸忠臣家。疏族外親。莫不連染。籍數百家。號冤聲徹天。兩列御史皆掩泣。瑛謂人曰。若不以叛逆處此輩。則吾爲無名事。見明史。然則劇演陳瑛請戮景清之尸。其毒尙小也。

建文帝削髮爲僧事。千古疑案。明舊史例議力辨其誣。且言建文帝闔宮自焚。身

殉社稷。死之正也。後人心惡成祖誅夷忠烈之慘。而不忍建文之遺殞。故詭言削髮出亡。以明帝之不死於火耳。此言誠是。然據王鏊守溪筆記。及陸樹聲朱國植等諸家紀載。事皆歷歷可考。故清初編定之明史。亦云都城陷。宮中火起。帝不知所終。或曰。帝由地道出亡。其後滇黔巴蜀間。皆傳有帝爲僧時往來蹤跡。世遂以帝爲遜國云云。則建文爲僧一事。當不虛妄。嘗讀然脂百一編。見中有清初錢塘徐淑則女士所撰革除建文帝紀一則。敘述頗詳。爲節錄之。

建文皇帝諱允炆。太祖嫡孫。懿文太子第二子也。母妃常氏。洪武二十五年。太子薨。帝年十六。立爲皇太孫。三十一年。太祖崩。帝卽位。前太祖所封諸王多不遜。有異謀。帝與太常卿黃子澄兵部尙書齊泰議削其權。以燕王善用兵。未卽討之。元年秋七月。燕王舉兵犯闕。執北平布政使張昺。都指揮使謝貴。殺之。詔長興侯耿炳文討之。爲所敗。命曹國公李景隆代督諸軍。又敗。四年夏。破大將軍盛庸軍。師潰江上。遂攻京城。景隆以城降。帝乃縱火焚宮。持楊應能度牒亡去。雲遊四方。自

湖湘入蜀。復如閩。既如廣西。至橫州南門壽佛寺。居之十五年。人莫知者。文帝遣使物色之。不得。最後居南寧陳步江寺中。已而去之。思恩州。至正統五年出見。知州岑瑛陳狀聞於朝。英宗勅馳傳歸京師。命宦侍內臣審諦良是。居之西內。號曰老佛。時年六十五矣。又四年以壽終。葬京師之西山。(下略)觀此則建文蹤跡鑿鑿有據。宜此種劇本之至今猶有價值也。

劇演工部尙書嚴震直受永樂之命。搜得建文帝於雲南鶴慶山中。時程濟從亡爲僧。痛罵震直。致震直悔恨交集。自刎而死。此事史雖未嘗明言。然於程濟傳。則言濟朝邑人。建文末官編修。金川門啓。濟亡去。或云濟從惠帝出亡。莫知所終。於嚴震直傳。則云震直烏程人。或謂其嘗奉使至滇。遇建文君。悲愴吞金死。觀此則草蛇灰跡。事亦有因。據庚巳編載震直湖之驥村人。累官至戶部尙書。奉使安南。死途中。葬郭外。他日有舟過墓側。遇一老公附舟。云至驥村。及嚴氏宅前。謂舟人曰。吾入內。以錢畀汝。登岸。一足濡於水。既入。久不出。扣其家。曰無之。顧地上有足

跡循之。乃入家廟。視公像。一足靴猶濕。始知是神歸也。又高坡異纂云。程濟有仙術。建文時。上言西北方兵將起。常預爲備。朝廷以其言妖妄。將置重典。濟曰。陛下幸赦臣。及期無驗。就戮未晚也。及期。靖難師起。遂赦出之。使護軍北行。戰於徐州。大捷。諸將立石紀功。具載姓名。濟夜潛往祭之。人莫測其意。及文皇過。徐見之。命擊碑。一再擊。遽曰。止。止。爲我錄碑來。既正位。按碑盡族諸將。濟姓名當擊處。不能辨。獨免。曩者之祭。蓋禳之也。後亡命不知所終。

十五貫院本考

院本演蘇州太守况鍾平反冤獄事。據其略云。淮安府山陽縣諸生熊友蘭。家住胯下橋。閉戶讀書。其書室與隣居馮玉吾媳臥房。祇隔一壁。適其媳牀側案上有金環二。寶鈔十五貫。爲鼠銜至壁穴。環墜友蘭書架上。友蘭晨起得環。出以示人。時玉吾子外歸。向妻索鈔不得。暴怒詬詈。氣促而死。玉吾以同謀斃夫告縣。山陽縣據金環爲證。坐其媳與友蘭於獄。追比寶鈔。兄友蕙亦諸生也。以貧故。赴蘇爲

船家當梢。一日載客。聞客述山陽事。知弟受冤。大哭。急欲趨救。苦無錢鈔。客中有陶復朱者。慷慨好義。解囊出十五貫授之。友蕙卽夕赴淮。黎明抵無錫。適與少年女子蘇戍妹同行於途。蘇戍妹者。父早死。母再嫁後夫尤葫蘆。亦死。葫蘆嗜酒。一日於友人處貸錢十五貫回家。戲其女曰。今日已鬻汝作婢矣。此身價銀也。女聞之恐。乘父醉臥。啓戶逃出。里有婁阿鼠者。賭棍也。夜半囊空。見尤戶半啓。掩入摸索。得牀頭錢十五貫。將行。適尤睡醒。驚呼有賊。阿鼠情急。卽拔刀刺尤死。迨四鄰聞聲。執火入視。惟見血泊中臥一葫蘆而已。分途急追。而蘇戍妹熊友蕙會逢其適。貸家出而證之。錢數吻合。十五貫也。遂由無錫縣刑訊屈招。鑄成鐵案。迨至按院秋決。委蘇州太守况鍾監斬。况守疑之。卒爲平反。坐婁阿鼠以大辟。釋四人於獄。後二熊俱成進士。其中情節。離奇巧詭。不必真有其事。然况太守固確有其人。蓋明初循吏也。明史况鍾本傳云。鍾字伯律。靖安人。宣德間。擇郡守九人。鍾知蘇州。授蠶書。假便宜行事。鍾初至。佯不解事。諸吏抱案環立請判。鍾問吏所欲行止。

吏喜。謂太守易欺也。越三日。召詰之曰。前某事宜行。若止我。某事宜止。若強我行。若輩舞文久。罪當死。捶殺數人。吏大懼。復斥屬官貪墨者數人。於是上無逋事。下無橫科。蘇人稱况青天。正統六年。秩滿當遷。部民叩閣乞留者二萬餘人。詔進正三品俸。仍視府事。楊士奇贈以詩曰。十年不愧趙清獻。七邑重逢張益明。及卒。市巷聚哭爲立祠。然則况公在蘇。其按獄必有可觀。十五貫事。雖屬子虛。而類此者。必亦不少也。惜無人載筆以記述之耳。

全家慶傳奇考

全家慶不知何人所作。演宮錦章積善感天事。略云。錦章字雄文。松江人。少失怙恃。年二十入泮。聞廬山紫雲道人善卜。往決行藏。中途遇桂榮留宿。榮女青娥。年方及笄。而嘔。乞錦章代卜。錦章行至淮水界。倦憩財神廟。見一蓬頭女子抱孩。欲投河。急救之。女云黃氏。夫錢德周。今日以納糧故。售去豢豕數頭。不意售得假銀。恐夫見責。故投河耳。錦章贈銀十兩勸歸。行至小湖山。山中勾簾洞有二千餘年。

青松能幻人形。與長江驪龍俱修仙道。而青松忽患癱症。驪龍又患癩病。遣卒邀錦章至洞。亦求代卜。并餽赤金三百兩。錦章遂詣廬山。紫雲道人者。卽仙人王子喬也。名爲賣卜。實度衆生。知錦章係天富星下凡。命僮迎之。錦章大驚。因入叩謁。先代桂榮驪龍青松子卜三事。紫雲斷云。桂榮之事。乃天風姤卦。主啞女見夫能言。婚姻成就。驪龍乃否卦。主否極泰來。飛騰之象。但須摘去領下一珠。青松子乃泰卦。必須陰陽配合仙丹。始得病愈。因贈金丹二粒。錦章復自卜終身。紫雲言汝一生事業。盡在前三卦中。不必再問矣。因留飯萬花叢中。錦章大醉而別。歸至小湖山。見青松子驪龍。備述始末。驪龍吞丹。卽吐出一顆明珠。胸中清爽。青松子吞丹。步履如舊。深感錦章。驪龍贈以明珠。青松子贈以如意火煉成寶劍。能避刀兵。旣而驪龍與青松俱飛昇仙去。錦章至桂榮家。述仙師斷語。卽以驪珠贈青娥。青娥得珠。口卽能言。榮喜甚。遂以女配青娥。於後園祈禱。見百道光。白鼠旋繞。掘之得金銀各十窖。俱鐫錦章名。乃昔財神鑒其陰騭。奏聞上帝。特撥寶藏庫以賜。

之也。未幾青娥生一子。錦章連捷。試卷已爲燈煤燒損。朱衣暗取餘卷。使錦章易之。遂獲狀元及第。司禮監王振以錦章策論譏刺時事。深憾之。時值倭寇侵犯。因與其黨大理寺卿聞可思。奏請授錦章兵部尙書。賜上方劍。率兵五萬征倭。青松子來爲設計。使守而不戰。待十五載自定。至十五戰。錦章子昌宗年十七。淹通經史。應試亦狀元及第。景泰帝賜碧雲公主爲配。昌宗奏父出師未歸。願助勦寇。功成就婚。景帝念其忠孝。卽授都統制。率兵十萬往。昌宗途遇難民千餘。卽捐萬金救濟。各歸田里。父子相逢。同勦倭寇。追倭至北海岸。倭急登戰船。而驪龍已爲金龍總管。暗助錦章父子。陡起風濤。倭船沉沒。遂班師。奏凱回朝。錦章授建極殿大學士。昌宗武英殿大學士。婚配公主。錦章五十誕辰。青松驪龍俱來獻瑞。景帝賜以壽詩。恩寵無比。福祿壽考。享厚德之報焉。

此種傳奇。最無趣味。其演喜慶之處。與百順記滿牀笏相髣髴。而迷信荒誕。尤爲可哂。且皆空中樓閣。按之正史。與諸家記載。未有合也。王子喬卽周靈王太子晉。

見劉向列仙傳。云好吹笙作鳳鳴。遊伊洛間。道士浮邱公接上嵩山。居三十餘年。七月七日。乘白鶴駐維氏山頭。舉手謝時人而去。不聞有紫雲道人之稱也。奸閹王振弄權。乃在明英宗正統初年。死於土木之難。景泰卽位。安得復有王振。入明以來。倭國卽與中國互市。中國財物。在寧波之雙嶼。與倭交易。自嘉靖初年。奸民汪直徐海陳東麻等逸至海島。爲倭主謀。始誘爲寇。嘉靖以前。未有倭亂。景泰前嘉靖數十年。安有征倭之舉。且景帝在位不過七年。而傳奇言錦章征倭歷十五年之久。歸受景帝封爵。說尤荒誕。此皆按之正史而毫無依據者也。驪龍吐珠事見莊子。莊子云。河上有緯蕭而食者。其子沒淵。得千金之珠。其父謂之曰。千金之珠。必在九重之淵。驪龍頷下。子能得珠。必遭其睡也。青松求丹事見范致明岳陽風土記。風土記云。呂洞賓憩城南古松陰。有人自杪而下曰。某非山精木魅。幸先生哀憐。呂因與丹一粒。枯枝復茂。李觀守岳陽。爲亭松前。曰遇仙亭。作者借此二事。紐合關目。富錦章父子實無其人。不過演一積善感應之事。爲下等人說法耳。

玉蟾蜍彈詞考

彈詞輒言男女私情。善惡果報。此通例也。是書以明少保于謙竭智盡忠。而卒爲武功伯徐有貞等所害。代爲不平。乃設言少保後身爲某公子。清才美貌。家藏十二玉蟾蜍。爲良工所琢。同一溫潤。其後適遇十二美人。皆與私定終身。贈蟾蜍爲定。而此十二美人者。則卽徐有貞等所轉生者也。同日成婚。爲其妻妾。則眞想入非非矣。按明史英宗正統十四年七月。衛拉特分道入寇。太監王振勸帝親征。兵部尙書鄺楚侍郎于謙力諫不聽。命郕王祈鈺居守。車駕倉卒就道。出居庸關。至大同。始班師。額森（又譯也先衛拉特部酋）兵襲軍後。圍御營於土木。（宣化府懷來縣西）帝與親軍突圍。不得出。敵擁之去。王振及公侯伯尙書侍郎以下。死五十餘人。官軍死傷數十萬。京師聞敗報。羣臣聚哭。侍講徐理（字元玉。後改名有貞）請遷南京。于謙曰。欲遷者斬。京師天下根本。一動則大事去矣。誓以死守。議遂定。郕王奉太后命卽位。改元景泰。遙尊英宗爲太上皇。以于謙爲兵部尙

書提督各營軍馬。時京師疲卒羸馬。不滿十萬。謙言軍旅之事。臣請以身當之。不效治臣之罪。時奸閹喜寧從上皇北狩。盡以中國虛實告額森。額森乃詭言奉上皇還京。攻入紫荆關。次蘆溝橋。石亨請堅壁以老。謙曰。如此則示弱。敵益輕我。乃遣諸將列陣九門外。自與亨陣德勝門。悉閉諸門。絕士卒反顧。下令臨陣而退。後隊斬前隊。將士知必死。皆用命。又徙附郭居民入內。而設伏空舍。令數騎誘敵。敵以萬騎來薄。范廣率伏兵出。以火器擊之。額森弟博羅平章諾茂海中礮死。都督孫鏗斬其前鋒。別部攻居庸關者。又爲提督羅通所敗。額森大沮喪。擁上皇出紫荆關去。帝以謙亨功大。加謙少保。封亨武進侯。上皇患寧喜。使還京索禮物。而以密書報宣府使殺之。額森失喜。無間諜。遂議和。送上皇歸國。入居南宮。景泰八年春。南郊。帝宿齋宮。疾甚。召石亨至榻前。使攝行祀事。亨退與都督張軏及曹吉祥謀復上皇。告太常卿許彬。彬曰。此不世功也。盍與元玉（有貞字）圖之。亨軏夜至有貞家。有貞升屋步乾象。亟下曰。時在今夕。不可失。會帝疾少愈。將於明日視朝。

宮門早啓。軼亨率家兵。混守禦官軍並入。薄南宮城。毀垣壞門而入。上皇問故。衆俯伏請登位。乃呼進舉。有貞等助挽以行。至奉天門升座。百官聞呼。譟震地。咸失色。有貞出號於衆曰。太上皇帝復位矣。趣入賀。百官震駭。入謁呼萬歲。命有貞以右都御史兼學士入內閣。卽班執于謙下獄。廢景泰帝仍爲郕王。尋死。上皇以謙有功。無殺意。有貞曰。不殺于謙。此舉爲無名。遂遇害。籍其家。無餘貲。子冕戍龍門。謙死之日。陰霾四合。天下冤之。宏治初。贈太傅。諡肅愍。賜祠於其墓。曰旌功。杭州河南山西。皆世奉祀不絕。復冕官。應天府尹。萬歷中。改謙諡忠肅。迎駕諸臣。均有封賞。有貞封武功伯。石亨忠國公。張軼太平侯。張輓文安伯。楊善興濟伯。太監曹吉祥錦衣衛世職。以許彬爲禮部侍郎入內閣。後帝悟謙冤。謫有貞戍金齒。亨吉祥均以不軌見誅。是諸臣在生前已見果報。不必俟其輪迴後也。而彈詞乃以有貞之後身爲其妻。而餘皆爲其妾。且外五人。有與茲事無涉者。則眞覆瓿之書。不值識者一笑已。

野叟曝言考

是書爲江陰夏君所作。夏君前清康熙時人。以名諸生貢成均。屢躋科場。鬱鬱不得志。乃出生平所學。悉於是書洩之。相傳是書成時。適值聖祖南巡。乃爲裝潢成冊。欲呈御覽。諸親友以書多穢語。恐觸上怒。致不測。力阻其獻。不聽。乃以危言動其妻。使陰阻之。其妻乃於每冊毀去四五紙。迨將獻。故驚曰。汝欲上呈御覽耶。嚮小兒女不知。已毀去多紙矣。夏君怒甚。急爲補綴齊全。而駕已沿江東下。不及獻矣。故其書名野叟曝言。取列子野人獻曝之意也。夏君湛深理學。而又長於兵詩醫算。乃以素臣自居。而以理學歸之母氏。以兵詩醫算分之四妾。舉所心得。宣洩無遺。書凡一百五十四回。其中講道學。闢邪說。敘俠義。紀武力。描春態。縱諧謔。述神怪。無一不臻絕頂。昔人評高則誠之琵琶記。謂用力太猛。余謂是書亦然。

書託言有明宏治年間事。按之正史。事實間有相合。而時代不能兩符。蓋作者欲言文素臣得君之久而孝宗在位。不過十有八年。凡所設施。未能暢透。乃截憲宗

成化十年以後。爲太子監國之年。而下移武宗之年。歸并安治。而終於三十三年。以宏治十八年孝宗上賓。改寫天子病愈。改元厭哭一事。隱成正史之實。此作者經營之苦心也。

書中朝臣外臣名氏。皆與正史關合。有合二人之名爲一人者。有分一人之名爲二人者。相臣宏吉。卽萬安劉吉也。太監靳直。卽汪直劉瑾也。附靳直之陳芳王綵。卽附汪直之陳鉞王越。附劉瑾之焦芳張綵也。安妃指萬妃。景王指寧王。臧寧指錢寧。汪彬指江彬。日本木秀寬吉夫婦。卽關白豐臣秀吉也。當時賢臣如劉健謝遷李東陽王鏊王恕馬文升劉大夏戴珊及內監覃吉懷恩。皆仍其名。無一易者。通倭漢奸宋素卿亦實有其人。

文素臣一生事業。皆采取當時諸大臣之武功文德。合而爲一人有也。以直言觸怒權監。遣戍遐方。至半途爲蟬蛻之計。傳聞溺死。厥後平江西。破宸濠。降田州蠻岑氏。則皆王文成公守仁事。且水夫人年逾百歲。亦與文成公母岑氏相合。破廣

西大藤峽擒侯大狗。爲右副都御史總督兩廣軍務韓雍事。在憲宗成化元年。距田州岑濬作亂幾二十年。而書中并爲一事。且增飾毒蟒以駭耳目。非紀實也。率部下飛卒深入紅鹽池虜營。伏兵夾擊。獲虜妻子。爲總督延綏軍務王越事。雲南孟密土司女曩罕弄據孟密叛。與普安土司隆暢妾米魯作亂。事隔十七年。曩罕弄爲閣臣萬安力主撫議。米魯爲戶部尙書王軾擒斬。是書乃并二事爲一。而歸其平亂功於干珠。亦附會也。宋素卿引倭寇入犯。爲嘉靖中年事。後孝宗崩幾三十年。征倭功以江南巡撫張經爲第一。然未嘗出海一步也。作者惡日本崇拜佛教。因造作平倭之說。此與征印度破錫蘭同一夢想而已。素臣奏行十二事。按諸史冊。實有因諸賢之請。而見於施行者。減宮女爲閣臣李賢所請。憲宗行之。雪于謙寃爲御史趙汝所請。憲宗行之。孝宗賜諡肅愍。祠曰旌功。及神宗時。又改諡忠肅。改景泰戾帝諡。號恭宗景皇帝。爲荆門州訓導高瑤所請。憲宗行之。復建文帝廟號年號。爲禮部主事楊循吉所請。疏下吏部。議格不行。錄功臣忠臣者後。則宏

治六年。帝意自行之。非由人所請也。餘皆作者以意爲之。在當時未見施行。亦未聞有請之者。

書中敘素臣道德經濟文章。皆臻絕頂。按之明史。惟王文成公守仁爲近之。乃作者取文成公之功業以爲功業。而不取文成公之學問以爲學問者。蓋守仁講學。專以致良知爲主。謂宋周程二子後。惟象山陸氏簡易直捷。有以接孟氏之傳。而朱子集註或問之類。乃中年未定之說。學者翕然從之。稱爲陽明之學。至前清之初。講學之風又盛。學者大都崇朱斥陸。以象山陽明之學爲近禪悟。詆爲異端。唾爲僞學。作者生當其時。習聞其說。遂亦吠聲阿和。而致於奏行第十二條。有禁生徒傳習陸九淵僞學。撤從祀聖廟主之議。實則程朱陸王。學派雖分。彙歸則一。猶之歐西學者。分格物窮理兩派。兩派之爭。雖亦酷烈。然不聞其廢倍根之格物派。而專徇笛卡兒之窮理派也。况程朱之學。難於見效。而陸王之學。易於見功。清季學者。又羣唾朱氏而宗陽明矣。作者此說。蓋徇一時之見。不足爲萬世訓也。

有明一代。道釋二教。實於成化年間爲最盛。史載憲宗卽位。卽以道士孫道玉爲真人。其後李孜省以符籙進。官至禮部侍郎。餘加侍郎通政太常太僕尙寶者。不可勝計。每令中官傳旨。一傳至百十人。時謂之傳奉官。又有僧繼曉以祕術進。賜號通元翊教廣善國師。其後西番僧劄巴堅參。封萬行莊嚴功德最勝智慧圓明。端仁感應顯國元教宏妙大悟法王。西天至善金剛普濟大智慧佛。其徒劄實巴。鎖南堅參。巴竹也。失。皆爲國師。已而劄實巴進。封法王。又封領占竹爲萬行清修。眞如自在廣善普慧宏度妙應掌教翊國正覺大濟法王。西天圓智大慈悲佛。旣又封西天佛子劄失藏士。劄失堅參。乳奴班丹。鎖南堅參。法領占五人爲法王。其他授西天佛子大國師國師禪師者。不可勝計。服食器用。僭擬王者。出則金吾仗。呵導。錦衣玉食者幾千人。羽流加號真人高士者。亦盈都下。大國師以上金印。真人玉冠玉帶。玉珪銀章。而繼曉尤姦黠竊權。所奏請無不允。迨孝宗卽位。盡汰傳奉官千百人。又詔禮官議汰諸寺法王至禪師四百三十七人。刺麻僧七百八十

九人。華人爲禪師及善世覺義諸僧官。千一百二十人。道士自真人高士及正一演法諸道官。一百二十三人。此雖出自孝宗賢明。而實由劉謝諸賢臣及內監覃吉等所贊成者也。而是書悉歸其功於素臣一人。且謂僧道皆助宸濠爲逆。此則欲加之罪。何患無辭。非紀實也。

憲宗居青宮時。萬貴妃已擅寵。及卽位。妃年三十有五。無子而妒。皇后吳氏摘妃過杖之。帝怒。廢居別宮。更立后王氏。妃寵益盛。後宮有娠者。皆計墮之。帝偶行內藏。悅宮人紀氏。幸之。遂有娠。萬妃使婢探之。婢謬報曰。病痞。久之。皇子祐檉生。卽孝宗也。萬妃急使門監張敏往溺。敏驚曰。上未有子。柰何棄之。稍哺粉餌。密藏他室。室與吳廢后所居西內近。廢后哺養之。貴妃日伺無所得。一日。帝召張敏櫛髮。照鏡嘆曰。老將至而無子。敏伏地曰。萬歲已有子也。帝愕然曰。安在。敏叩頭曰。奴言卽死。萬歲當爲皇子主。太監懷恩亦頓首曰。敏言是。皇子潛養西內。今已六歲。匿不敢聞耳。帝大喜。卽日幸西內。遣使迎皇子。紀妃抱皇子泣曰。兒去。見黃袍有

鬚者兒父也。吾不得生矣。衣以小緋袍。乘小輿。擁至階下。髮披地。走投帝懷。帝置之膝。撫視良久。悲喜泣下曰。我子也。類我。懷恩赴內閣。具道其事。傳帝意。欲宣示外廷。羣臣大喜。相率賀帝。帝命皇子出見。大學士商輅頓首請立爲皇太子。帝頷之。遂定名祐檣。頒詔中外。時紀妃仍居四內。商輅恐有他變。奏請移就近所。俾母子朝夕相接。遂移紀妃於永壽宮。萬妃日夜怨泣曰。羣小給我。未幾。紀妃暴斃。相傳爲萬妃縊死。張敏懼。亦吞金死。時周皇太后居仁壽宮。語帝曰。以兒付我。太子遂居仁壽。一日。萬妃召太子食。太后謂曰。兒去。無食也。太子至。萬妃治食。曰。已飯矣。進羹。曰。恐有毒。萬妃曰。是兒數歲卽如是。他日魚肉我矣。因恚成疾。太子旣出閣。老闈覃吉朝夕侍。口授四書及古今政典。太子偶讀佛經。見吉入。曰。老伴來矣。急手孝經。端本正始。吉有力焉。萬安以姪禮事萬妃。賴妃力入閣。爲相十八年。成化二十三年正月。萬妃卒。年五十七矣。帝震悼。輟朝七日。謚恭肅。端慎榮靖。皇貴妃。八月。憲宗崩。孝宗卽位。於宮中得疏一小篋。皆論房中術。末署曰。臣安進。帝令

太監懷恩持至閣曰。此大臣所爲耶。安愧汗伏地求哀。無去志。恩直前摘其牙牌曰。可去矣。始惶遽歸第。乞休去。時年七十餘。尙於道上望三台星。冀復用。紀妃在日。嘗自言家賀縣。姓紀。不能知親族也。孝宗卽位。遣人求太后家。於是有冒太后戚。以希寵貴者十數輩。後訪得實。皆謫戍。而紀太后家終不可得。厥後禮臣請做太祖封馬后父徐王故事。定擬太后父母封號。立祠桂林。致祭。帝詔曰。孝穆太后早棄朕躬。每一思念。怒焉如割。初謂宗親尙可旁求。寧受百欺。冀獲一是。卿等謂歲久無從物色。請加封立廟。以慰聖母之靈。皇祖既有故事。朕心雖不忍。又奚敢違。遂封后父慶元伯。母伯夫人。立廟桂林府。有司歲時致祀。資治通鑑所載如是。是書言安妃雞皮三少。等於夏姬。誠非虛語。至乾清三擋。則係粉飾之辭。不足據也。至一百四十四卷。謂紀后之弟紀恩。與水夫人之弟水雲。年皆耄耋。翩然來歸。此特爲孝宗彌其缺憾。無是事也。

遊龍傳演義考

俗傳正德遊龍。信有其事。然觀正史及各家紀載。皆未有如演義所云也。史載武宗卽位。倖臣江彬欲攘權。數導帝遠遊。使他倖臣不得近。因言宣府樂工多美婦人。且可觀邊釁。何鬱鬱居大內。爲廷臣所制。帝然之。十二年秋八月。急裝微服出德勝門。幸昌平。大學士梁儲蔣冕毛紀追及沙河。請回蹕不聽。至居庸關。巡按御史張欽閉關不奉詔。乃還。令太監谷大用代欽。數日復夜出度關。幸宣府。彬先爲帝建鎮國府第。鞏豹房（帝晏處地。二年作在西華門）。珍玩女御實其中。彬從帝輒夜入人家索婦女。帝大樂忘歸。稱曰家裏。十三年正月還京。留十四日。復如宣府。二月太皇太后王氏崩。始還京。秋七月。帝託言邊關多警。復北幸。駐蹕宣府。彬又導帝由大同渡黃河。次榆林。至綏德州。幸總兵官戴欽第。納其女還。由西安歷偏頭關。抵太原。大徵女樂。樂工楊騰妻劉氏善謳。悅之。載以俱歸。大見寵幸。江彬與諸近倖皆母事之。稱劉娘娘云。十四年春二月還京。又欲往兩畿山東祈福祀神。郎中黃鞏修撰舒芬等百四十六人先後疏諫。悉杖之。死者十一人。車駕遂

亦不出。夏六月，寧王宸濠反。巡撫南贛都御史王守仁起兵討宸濠。擒於樵舍。秋八月，帝假親征爲名，駕發京師。冬十二月，如南京。江彬從帝至揚州，卽民居爲提督府。遍刷寡婦處女，導帝漁獵。以劉姬諫稍止。及至南京，彬又欲導帝幸蘇州。下浙江，抵湖湘。羣臣極諫，會其黨亦勸阻，乃止。十五年閏八月，受江西俘，發南京。九月，至清江浦。自泛小舟，漁於積水池。舟覆溺焉。左右挾帝出，遂不豫。冬十月，至通州。誅宸濠，還京師。十六年春正月，郊祀。帝嘔血不能成禮，輿疾歸。三月，益甚。謂太監陳敬蘇進曰：朕疾殆不可爲，可以朕意達皇太后。天下事與內閣輔臣議處之。前此事皆由朕誤，非汝輩所能豫也。遂崩於豹房。江彬黨李琮勸彬速反，不勝則北走塞外。彬猶豫未決。大學士楊廷和、蔣冕、毛紀與太監溫祥、魏彬、張永密謀捕江彬，誅之。彬誘武宗出遊，計前後凡五年。所幸民間婦女，不可僂指數。演義因之。遂有游龍戲鳳之說。至於王龍鬪寶諸事，則皆空中樓閣，爲後人之所杜撰者矣。明武宗所幸民間女，見於毛廷齡《彤史拾遺》記者凡三人。然不聞有李鳳姐也。一

爲馬昂妹。美而艷。適畢指揮有娠。江彬白之上。迎入豹房。馬氏善騎射。解于圍龜。茲諸樂。能道番語。遂絕幸。封兄昂右軍都督。馬氏一門。無大小皆賜蟒衣。六科給事中呂經石天柱御史徐文華程起充皆上書諫。言孕婦不可進御。恐蹈秦晉易姓覆轍。不報。後得劉美人而馬寵始衰。一爲劉美人。太原民劉良女。晉王府樂戶楊騰名下妓也。(史謂楊騰妻)正德十二年幸大同。駐蹕偏頭關。徧索女樂於太原。美人偕衆妓進。上悅其色。聆謳大喜。載歸。初居豹房。後漸入西內專寢。言事輒聽。左右觸上怒。陰求之。輒一笑而解。諸近倖以母事之。呼劉娘娘。上將南征。陰移美人至潞河。約駕先發。而以他舟迎美人。美人脫一簪贈上爲信。曰見簪而後赴。上藏簪衣間。馳馬失簪。大索不獲。至臨清。遣中使召美人。美人辭曰。不見簪。非信。不敢赴。上乃獨乘舸晝夜行。內外從官無知者。徬徨至張家灣。親迎美人。載而南。適湖廣參議杜文縝衝上舟過。怒止之。入其舟。奪一妾行。及至揚州。屢出獵。馳突不測。美人諫始止。自上方寺至南京。所臨寺觀。旛幟錦繡。悉署威武將軍鎮國總

督（帝自封此銜）朱壽及夫人劉氏名字其上。及世宗入嗣。用南京給事王紀言。始令撤去。一爲王滿堂。霸州民王智女。以麗色嘗與選嬪宮。罷歸。恥不適人。時感異夢。謂有趙萬興者來聘。當許之。其人貴不可言。里中僧出入智家。知其夢。以語道士段銀。段挾妖術。賂僧。使先一日謂智家曰。爾家明日當有大貴人至。詰旦銀至。問姓名。曰我趙萬興也。智家謹呼羅拜。遂妻以滿堂。銀出妖書。煽惑愚民。愚民神其夢。從者益衆。儒生潘依道孫爵謁銀。行主臣禮。遂僭號。改元大順。既銀爲新城民掩獲。併得妖書。撫按以聞。詔釋愚民。獨斬銀。依道爵三人西市。中旨令勿殺滿堂。沒入浣衣局。既而召侍豹房。大幸。世宗嗣位。出浣衣局。人謂之王浣衣云。小說之紀正德遊龍事者。不止一種。如落金扇。如白牡丹。事既附會可笑。文尤鄙俚不堪。此皆僅爲下乘禪說法。非大雅所欲觀也。

翡翠園院本考

院本演江西狀元舒芬未達時事。據云。芬父德溥授徒湖廣。歲杪歸家。途遇王饒

頭賣妻償債。心爲惻然。因出脩金贖之。王饅頭感謝而去。然舒家極貧。終歲所賴以贍養者。祇此硯耕所得資耳。迨德溥空手而歸。充饑乏術。乃命妻子於王陵旁挑掘苦菜。暫圖餬口。舒家傍河而居。有湖州籍趙媽媽者。穿珠爲業。生一女翠兒。絕美。有機智。泊舟其旁。與舒家往來已稔。除夕聞空中神語云。舒生舒生。今年喫苦菜。明年中狀元。趙氏母女奇之。然不解苦菜之說。因假元旦賀歲爲名。詣舒夫人。告以神語。且詢其由。舒夫人悉告之。趙母女大感動。急出銀米助之。時寧府長史麻逢之助王宸濠謀逆。召翠兒製造萬壽珠冠。獻王取媚。逢之女斐英美而賢。與翠兒一見莫逆。囑常過從。引爲閨中密友。逢之又爲寧王起園亭一所。號翡翠園。東南一角。適礙舒家住屋。因命豪奴逼使讓賣。舒父子執意不從。逢之無奈。偵舒嘗往王陵旁挑掘苦菜。因假盜掘王陵斫伐塚樹罪。移文副使。使羅織之。時王饅頭爲刑廳差役。奉命拏舒。王念舒恩。釋德溥父子使逸。旣而德溥恐王受罪。自願投案。幸副使爲涿州胡世寧。清廉正直。知舒爲王府誣陷。但令繫獄。並不加刑。

寧王大怒。奏參胡世寧革職。命麻長史覆按德溥。問成大辟。將舒屋發封入官。舒夫人無家可歸。幸趙翠兒扶入舟中。移泊他處。翠兒日往長史女斐英處求救。斐英屢諫其父不聽。適王府發下令牌。命將德溥從速取決。翠兒情急。俟長史睡熟。盜出令牌。囑王饅頭持往監中。假傳王府令旨。將舒釋放。長史睡醒。見令牌已失。查知爲翠兒所盜。急拔刀。命家將追往舟中殺之。家將誤殺其母而返。由是舒家夫婦翠兒王饅頭均各逃生。舒芬自爲饅頭釋後。輾轉入京。苦功勤讀。中正德十二年丁丑科進士。賜狀元及第。芬母感翠兒德。爲芬聘之。未幾寧王事敗。長史見誅。翠兒勸芬娶斐英爲妻而已下之。

按舒芬胡世寧信有其人。確與寧王同時。然事恐子虛烏有也。明史舒芬傳云。芬字國裳。進賢人。年十二。獻馴雁賦於知府祝瀚。遂知名。正德中進士授修撰。帝議南巡。芬偕編修崔桐等抗疏諫。郎中張衍瑞等百餘人繼之。帝怒。執六人下獄。詔芬等一百七人跪闕前五日。旋於闕下杖之。人三十。死者十一人。芬創甚。幾斃。鼻

至翰林院。掌院者懼罪。命標出之。芬曰。吾官此死此耳。謫福建市舶副提舉。裹瘡就道。世宗卽位。召復故官。時帝欲尊熾本生。芬偕其僚連章極諫。復從楊慎等一百三十四人伏左順門力爭。帝怒。下之獄。廷杖人三十。旋遭母喪歸。卒於家。世稱忠孝狀元。芬豐神玉立。端居。竟日無倦容。夜則計過自訟。其學貫串諸經。兼通天文律歷。而尤精於周禮。學者稱梓溪先生。萬歷中追諡文節。

胡世寧字永清。仁和人。宏治中進士。性剛直。不畏強禦。且知兵。累遷江西副使。寧王宸濠驕橫有異志。莫敢言。世寧憤甚。上疏揭奏。草疏時。次子繼請曰。是且重得禍。世寧曰。吾已許國。遑計其他。疏入。果下獄。繼念其父病死。世宗卽位。起爲兵部侍郎。遷左都御史。世寧風格峻整。居官廉。與人語訥。不出口。及具疏。援據古今。洞中窾竅。與張璠桂萼論事多牴牾。諸大臣多忌之。帝始終優禮不替。

觀此則世寧之革江西副使。果爲寧王所陷。初與舒芬無與也。史稱寧王驕橫。盡奪諸附王府民。賁民問子錢。強奪田宅子女。是起造翡翠園事。非盡無據。作者

因舒芬生長進賢。與寧府近在咫尺。而且又狀元及第。因附會其事。編成院本。實皆空中樓閣。卽麻逢之亦史無其人。更無論王饒頭趙翠見矣。

一片石傳奇考（第二碑附）

一片石傳奇。鉛山蔣清容先生藏園九種曲之一也。演寧王事敗。正妃婁氏投江而死。漂至德勝門外。被南昌漁人網起。見遍身紙條密結。知是賢妃。遂厚葬之。越二百餘年。有書生薛天目者。題詩感夢。因欲訪其墓不得。因請於江西方伯籛公。爲之代訪。得於新建上饒兩縣漕倉之間。其地久爲小民雜處。封蠶俱廢。爰立一碑以誌古蹟。此實清容先生自紀其事也。薛天目爲清容自託。籛方伯實係彭姓。卽中州彭家屏也。其一片石自序云。前明寧庶人（寧王事敗後。削宗室籍爲庶人）婁妃。沉江後爲南昌人私葬。二百年來。無有志者。乾隆辛未春。南昌蔡書存先生謂余曰。昔聞朱赤谷老人言。婁妃有墓在城外隆興館側。今廢矣。碑跌尙存。惜無能復之者。余領之。明日。告青原方伯。方伯意怏怏。急遣吏訪其處。遂立碑表。

識之。越三日，有鍾某來謁方伯，伏地拜不起。曰：某本上饒婁氏裔，妃卽某先世祖姑。因避逆藩禍，易姓鍾，旋徙居隔江沙井。崇禎末，宗室子弟鬻妃墓，爲郡守陳公建生祠，守憫焉。索地券，益官牒一紙，給某家永守。戒勿更售。鼎革時，塚漸傾廢。後建上饒新建兩漕倉，以有妃墓故，虛其間隙地數丈。今市兒各構屋實之。乃探懷中牒以獻，則硃墨符篆，居然前代物。方伯喜慰，益信篤。或疑妃沉樵舍，有順流西下皖江耳。安得逆溯城闕，是獨不聞曹娥叔先雄之故事乎？夫義烈之鬼，皮骨苟存，且有應聲逐人者矣。有反側鼎鑊中者矣。精氣不滅，可動天日。區區河伯，敢不迴旣倒狂瀾，成賢妃首邱之志。然則好爲議論者，固未可執方隅固陋之見，以斷其爲必無也。妃之窆也，余固未見。勝國官牒則旣見之。豈鍾氏於百歲前，逆知有彭公其人，而預爲此贗物相待，是不辨而自明矣。（下略）碑記爲中州彭家屏自撰。清容有題墓畫詩七絕四首，并錄於後。

彭方伯婁妃墓碑記

妃爲上饒婁諒女。當宸濠萌逆時。妃曾作詩諷之。且力諍不聽。卒致殄滅。乃自沉以殉。邦人欽其賢且烈也。爲具厚殮葬於此。二百年來。無有志者。余廉得之。遣吏往查。視封蠶久廢。僅餘碑。跌埋沒泥沙中。至轉徙湮沒之故。妃家後裔易姓鍾氏。居沙井者。尙能言之。特爲刻石表其處。使人知巾幗流芳。雖骨朽後。其生氣且與江聲同浩浩矣。墓在上饒新建兩倉中間。盈字廩之後。乾隆十六年辛未仲春月（銜名略）立并識。

蔣清容題墓畫詩

水際埋香太等閒。忽忽何處卜青山。玉魚金盃無人見。只有秋江似佩環。斷碣銷沉劫後灰。已無華表鶴來歸。柴關土鏗人稀到。消受官廚酒一杯。聚米量沙計已空。唱籌聲合院西東。江城豈是無閒土。豚榭雞栖據此中。遺垢畫就免傳訛。藝苑應摹陸法和。不許碑陰牛礪角。詞人經此定摩挲。

按明史言寧王謀逆。正妃婁氏諫不聽。及與王守仁戰大敗。退保樵舍。聯舟爲方

陣守仁以小艇實葦。擬建昌人語。就賊艦乘風縱火。焚其副舟。婁妃以下皆赴水死。宸濠舟膠淺。倉卒易舟遁。王冕追執之。宸濠歎曰。昔紂用婦言亡。我以不用婦言亡。悔何及。觀此則婁妃賢淑。較諸脫簪姜氏。摩笄趙姬。有過之而無不及。宜後人流連景慕。不忍遺墓之久湮榛莽。而必欲表之使顯也。

第二碑又名後一片石。亦爲蘇園九種曲之一。前僅爲婁妃建碑表識。此則更爲建立新坊。開闢兆域矣。清容仍自稱薛天目。所謂方伯季延陵者。則漢陽吳翥堂也。書生阮斗墟。卽宛陵阮龍光見亭。清容先生自序云。婁妃墓在新建上饒兩倉間。埋沒貧家窳側有年矣。乾隆辛未春。予訪得之。告青原方伯。時移藩滇南。且戒裝。不得廓清塋域。僅立碑表識而去。歷今二十六載。予每寓書有司。乞擇官屋一區。徙此破屋。以妥妃靈。無有應者。乙未冬。漢陽阮見亭茂才過訪。執手如平生。卽以故。則以傳抄中心折。予所撰一片石舊詞。蓋十餘稔。每以不及訂交爲憾。予乃傾倒見亭者不能已。見亭時往虔南省舅氏太守翥堂吳公。匆遽特甚。明年。上特

原

书

缺

页

原

书

缺

页

原

书

缺

页

原

书

缺

页

原

书

缺

页

原

书

缺

页

原

书

缺

页

原

书

缺

页

塾師學。嘉靖中登進士。歷任兵部員外郎。時廷臣議開馬市。繼盛上疏。言五謬十不可。語甚剴切。帝以阻撓邊務。詔訊杖。貶狄道典史。仇鸞敗。帝思繼盛言驗。乃自典史遷知縣。俄遷南主事。三日遷員外。遂劾嚴嵩。顛政誤國十大罪。疏長不具錄。末言陛下可召問裕景二王。或詢諸閣臣。重則置憲。輕則勒令致仕。內賊既去。外賊自戢。疏入。上怒。詔詰何故引二王。繼盛曰。非二王誰不懼嵩者。獄上。杖之百。血肉全起。下刑部擬罪。繫三載。會張經李天寵坐大辟。嵩揣帝意必殺二人。因附繼盛名並奏。繼盛妻張氏上疏。請代夫死。詞極哀痛。嵩屏不達。遂斬西市。臨刑賦詩曰。浩氣還太虛。丹心照千古。生平未報恩。留作忠魂補。天下涕泣傳誦之。初繼盛之將杖也。或遺之蝻蛇膽。却之曰。椒山自有膽。何蝻蛇爲。及入獄。創甚。夜半而蘇。碎餐盃。手割腐肉。肉盡。筋挂膜。復手截去。獄卒執燈頭墜地。繼盛意氣自如。朝審時觀者塞衢。皆歎息。有泣下者。後七年嵩敗。穆宗立。卹直諫諸臣。以繼盛爲首。贈太常少卿。謚忠愍。予祭葬。建祠名旌忠。任一子官。

附錄椒山夫人張氏請代夫罪疏

罪臣兵部郎中楊繼盛妻張氏跪奏皇帝陛下。竊臣夫以誣讎相臣。發交錦衣尉待罪。此實臣夫溺職辜恩。法無可逭。臣妾何敢冒瀆宸嚴。自取咎戾。然仰維聖德。昆蟲草木。皆欲得所。豈惜一回天聽。下垂覆盆。儻以罪重不可赦。願卽斬臣妾以代夫誅。臣夫感皇上再造之恩。必能執戈矛衛社稷。以効一日之力也。

椒山文集有獄中與子書一篇。自敘下獄事甚詳。而其真跡則藏於浙江某氏。成手卷一。高盈尺。長丈餘。字大於錢。行書作爭坐位體。後有蕭山湯文端公跋云。此楊忠愍公獄中與子書也。忠義勁直之氣。溢於楮墨。觀兩眼觀心。意不敢亂。及椒山自有膽數語。知所得於養心養氣者深矣。咸豐甲寅夏至前三日。蕭山後學湯金釗謹識。書較集中所刻。微有不同。知集經後人刪削故也。一蟹嘗於友人處見鈔本一通。爲錄於左。以備參考。

椒山先生獄中與子書

癸丑元日。謄奏劾大學士嚴嵩稿本。初二日齋至端門。方欲進。聞拿內靈臺官。知本意不洽。卽趨出。日怏怏不懌。至十四日。乃齋戒沐浴三日。至十八日。本上。二十日拏送鎮撫司打問。先拶到手。拶木繩俱斷。予曰。鬼神在上。尙用刑哉。乃先敲一百。敲問所以主使之。人。予曰。當此時之臣。奸邪大半皆嵩心腹。此事固不可與之議。且盡忠在己。豈必待人主使。如有人敢主使。則彼當自爲之矣。又何必使人爲哉。乃夾一夾。將脛骨又夾出。問所以引用二王之故。予曰。奸臣之誤國。雖能欺聖上。必不能欺二王。蓋二王年幼。且未冊封。奸臣必不提防避忌。譬如人家。有家人作弊者。家長雖不知。而家長之子未必不知也。滿朝皆嵩之奸黨。孰敢言彼之過。皇上常不與二王相見。此奸賊所以敢放肆無忌。然止能瞞皇上一人。二王固知之真矣。至親莫若父子。皇上若問二王。必肯言彼之過也。問官云。若此豈敢回本。乃又敲五十二敲。又夾

一夾棍。其問答之辭甚多。予始終不屈。乃重打四十棍。釘肘鍍送監。至二十二日晚。奉旨錦衣衛打一百棍。四棍一換。送刑部從重議罪。乃比依詐傳親王令旨律。絞監候。方予未上本之前。司中日相與議論者。汪子少泉。周子松崖。王子繼津。少泉則與謀議。冒功一節。乃其所見。松崖則與知而不見其稿。繼津則知其欲爲而不知爲何事。上本後。入部交牙牌。辭僚友。衆方知予有此舉。各疾讎遠避。而一二知己。雖有眷戀之情。尙多畏難之狀。獨繼津則肝膽相許。若親兄弟然。予觀其義氣激發。情愛懇至。遂托云。予二子一女。一子已聘有妻。一子尙未有。一女尙未許人。長而娶嫁。皆兄之事也。繼津遂而許云。此盡在弟。而一小女正與三令郎年歲相當。遂許焉。自予入獄。鎮撫司刑部之保護。皆繼津也。其受打之先。王子西石送蚺蛇膽一塊。袖入。托校尉苗生者酒一壺。云。可以服蚺蛇膽。予曰。椒山自有膽。何必蚺蛇哉。止飲酒一茶杯。彼又云。莫怕。予曰。豈有怕打楊椒山哉。遂談笑赴堂受打。未打之先。心已

有定。至打之時。乃兩眼觀心。舌抵上腭。牙齒緊對。意不敢亂。口不呻吟。蓋一
呼叫則氣亂。氣亂則血入心。必死。方打四五棍時。心受疼不過。若忙亂者。遂
一覺照。自思此心亂矣。於是提起念頭。視己身若外物者。打至五六十。忽覺
若有人以衣覆之者。遂不覺知痛。謂之神助。不其然歟。打畢。校尉卽推入包
袱。抬出。至門外。則家人以門扇擡之。至法司門口。巡風官乃同年江西李天
榮者。遂革去門扇。藥餌諸物。一皆阻住。予兩腿腫粗。相摩若一。不能前後。腫
硬若木。不能屈伸。止手扶兩人。用力努掙。足不履地而行。入獄。提牢則浙江
奸黨劉檣也。舊規。官繫獄則有官監。劉檣乃下予於民監。白入監後。棒瘡（
字缺）上衝。難以曲折。努動。方依牆而立。忽兩耳響一聲。不能聽事。又兩目
黑暗不能見。予心自覺曰。此乃死矣。遂昏不醒。人事。身不覺倒地。若睡熟然。
至三更始甦。噫。忽然而死。忽然而甦。如睡又甦。則人之生死。亦甚易事也。兩
腿腫脹衝心不能忍。又無藥可用。又無刀針可刺。正無計問。司獄陝西涇陽

劉時守送茶一鍾。予飲之。心稍定。因茶想起人以瓦尖打（字缺）事。遂將鍾打碎。取瓦之尖而銳者。將竹筋破開。夾瓦尖在內。用線拴住。緊以尖放瘡上。用鼓錘打筋入肉五六分。爲此者獄吏山東黃縣孫儒。犯人浮梁何成也。遂血出。兩腿打有五六十孔。流血初噴丈餘。後則順腿流於地。一時約十數碗。自出血後。心稍清矣。予恐猝倒。則血必奔心。自打後出衛入刑部。三日夜挺身端坐。頭未至地。以故不能傷生云。藥餌既不可得。予潛使人在監買黃蠟香油。自熬膏藥貼之。至二十六日。則右腿已潰。將皮割去。內肉流於地如稀糊。口顯一坑。長五寸。闊三寸。深一寸五分。手摩至骨。時有京師秀才侯冕送藥物。敷之。又內侍趙用送藥。服之。劉檝禁繫甚嚴。內外不通。外面人傳已死四日矣。家人甚忙亂。至二十七日。張弘齋重差人入視。知予不死。家人尙不信。予託獄吏新城縣盧世經捐出牛骨簪一根爲信。此簪乃妻嘗帶者。又左手寫書帖去。家人始知予不死。方勅下刑部擬罪。時山東司郎中同年史觀

吾欲從輕議。而尙書何鰲乃嵩之門生。侍郎王學益乃嵩子世蕃兒女親家。聽嵩指使。遂擬此罪。命下。史欲有言。學益怒目視之。無何。史降官矣。刑帖到。司獄司卽下老監。日夜籠桎。與衆囚爲伍。死屍在側。備極苦楚。二月初七八。右腿已長肉。左腿皮未割去。遂潰腫如小甕。毒氣上攻。口舌在瘡。不能飲食。勢已危矣。夜夢三金衣人領一青童子。小盒內捧藥一丸。遂以得親灌入。覺則口舌不痛。可喫飲食。又想起以磁瓦尖打之。連數十下。不見膿血。予曰。此瘡潰已深。非瓦尖所能到也。遂以小刀。先用針線。將腿皮穿透提起。乃將刀刺入。約一寸深。周圍割一孔。如錢大。膿血流出。方予割肉時。獄卒持燈手戰。至將墜地。乃曰。關公刮骨療毒。猶藉於人。不似老爹自割者。當時約四五碗。其內毒始脫矣。日每以數十（缺字）片拭膿。每布約二尺。每日此布輪用。膿可拭兩次。每日則膿可流二三碗矣。自初瘡至愈。膿豈止六七十碗而已哉。十六日右腿垂筋二條。如簪粗。一頭已斷。一頭尙在腿上。予亦割之。二十八

日提牢官丘洲峯乃獨仗公義。遷予於監東獄卒小房。幸脫籠桎。九日朝審。予帶長板扭錄出門。觀者如堵。爭飲一見顏色。至擁塞不能行。入朝坐西廊下。內臣圍予觀者以千數。有餽飲食者。有送銀錢者。予俱卻不受。內臣益鼓舞稱贊。而罵嚴嵩老賊以萬數。審時爲首執筆者。則吏部左侍郎王用賓也。(字缺)判以此律情真。奏請題奉。欽依着照舊監候處決。甲寅夏間。獄疫大作。日與病者爲伍。四月二十六日。遂染瘟疫。時刑部醫官羅廷瑞。江四人。進予發汗藥二服。下藥二服。予病中欠主張。俱依彼服。遂昏不省人事。提牢官又江西奸黨曹天佑。此官乃人家奴僕。讀書中進士。後方出姓。無恥小人。又斷絕醫藥如初獄。然人皆以予必死。幸五月。提牢官乃浙江應養虛。乃親檢得藥。視飲食。十四日方出汗。噫。若使命不在。死之久矣。是月二十六日。養虛乃說堂出予老監。遷予外庫。居處則甚便。方養虛遷予時。庸軟輩皆喝以重禍。彼乃毅然爲之。其人品可知矣。九月朝審。乃福建李默爲首也。仍判以情

眞題奉。欽依。又如前監候。己卯九月朝審。復議情眞奏請。或云張經任南直隸總督。因倭寇失事。皇上先已告廟打科官。必欲殺之。經用厚賄。買脫。嵩費銀二萬。及諸奸黨欲爲彼脫者。判與予同奏本請。意以予乃皇上心所繫念之人。或得混免伊死。或曰。嵩知經爲皇上所必殺。欲因以及予也。奏上。皇上。一見經名。旨意遂云。依律處決。予知之。付命而已。平昔予同志輩若王繼津。徐望湖。王鳳洲。楊明石。楊毅齋。龔全山。孫聯泉。應養虛。李鶴峯諸公。爲予奔走救解。鳳洲爲予畫策。竟不可回。事已如此。書付應尾。應箕收藏。以爲後日墓志之用。椒山據柩牀書。

嚴嵩以河套一役。冤殺夏言。曾銑事皆紀實。按明史。陝西總督曾銑首議恢復河套。閣臣夏言欲倚以成大功。因密薦銑。謂羣臣無如議忠者。銑鳩兵繕寨。輒破敵。帝亦頗向之。令言擬旨優獎者再。銑喜。益銳志出師。條上方略。廷議一如銑言。帝忽中變。降旨詰責。詞甚嚴厲。嵩知帝意。遂極言河套必不可復。廷臣亦盡反前議。

如嵩說。嵩乃力攻言。謂向擬旨褒銑。臣皆不與聞。言始大懼謝罪。且云。嵩初未嘗異議。今胡乃盡委於臣。帝已入嵩譖。怒不可解。盡奪言官階。令言致仕。兵部侍郎萬鍾等劾銑罔上貪功。擅開邊釁。逮入獄。時甘肅總兵仇鸞。以貪功爲銑所劾。逮問在獄。嵩雅親鸞。代鸞草奏。誣夏言納銑金。法司承帝旨。坐銑交結近侍律。斬西市。妻子流二千里。並逮言下吏。言抵通州。聞銑所坐。大驚墮車。曰。噫。吾死矣。上疏訟冤。言鸞方就逮。上降諭不兩日。鸞何以知。蓋嚴嵩與崔元輩。詐爲鸞疏以傾臣。嵩靜言庸遠似共工。謙恭下士似王莽。奸巧弄權。父子專政。似司馬懿。臣生死係嵩掌握。惟聖慈曲賜保全。不省獄成論死。法司援議賞議能條以上。上怒。切責之。會諂達寇居庸。嵩謂夏言等收河套。故報復至此。遂棄言市。妻蘇氏流廣西。而仇鸞反出獄。總督京營戎政。尋且於宣大開馬市。而邊防益弛。椒山疏言五謬十不可者。卽爲仇鸞發也。

王漁洋香祖筆記。謂聞諸姚士麟叔祥云。海鹽有優兒名金鳳者。以色幸於嚴東

樓東樓非金。寢食弗甘。嚴氏既敗。而鳴鳳記盛傳於時。時金已衰老。乃復塗粉墨。扮嚴東樓。揣摩醜惡諸態。無微不至。觀此。是書信爲同時人所斷。非後人追述者矣。

十美图彈詞考

十美图敍曾銑二子。因父爲嚴嵩所害。更名改姓。避難四方。長子輾轉入京。得娶嚴東樓趙文華及徐林諸姓女爲妻。次子亦得娶故相夏言及龍余諸姓女爲妻。厥後得海剛峯提挈。發憤讀書。均以狀元及第。征服叛將仇鸞。得嚴嵩通鸞證據。奏明天子。盡雪前冤。置嚴於法。欽賜十美图圓。此皆無稽之談。作者以曾銑有功見戮。忠奸倒置。故藉此以鳴不平。非紀實也。曾銑信有其人。以征河套。爲嵩誣殺。前於鳴鳳記考之詳矣。顧不聞其有二子名曾榮曾貴者也。

鄒懋卿江西豐城人。由行人擢御史。進左副都御史。爲嚴嵩父子所睚。以嵩力得總淮浙長蘆河東四鹽運司。盡握天下利柄。及嵩敗。以贓戍邊。趙文華浙江慈溪

人。中進士。未第時在國學。嚴嵩爲祭酒。才之。仕至通政使。與嵩結爲父子。尋進工部侍郎。倭寇棘。奉命祭東海。兼察軍情。恃寵恣睢。賄賂填集。江南爲之困敝。譖殺吏部尙書李默。帝謂文華忠。進尙書。一日登高。見長安街有高甕。問誰宅。左右曰。趙尙書宅也。帝愠。且聞其在江南贖貨要功狀。怒。黜爲民。戍其二子於邊。文華故病蠱。及遭譴臥舟中。意邑邑不自聊。一日捫其腹。腹裂。臟腑出。遂死。二人見明史奸佞傳。

又明史奸佞嚴嵩傳云。嵩字惟中。分宜人。宏治中進士。授編修。嘉靖中拜武英殿大學士。入直文淵閣。進吏部尙書。當國二十一年。一子世蕃承蔭。短項肥體。眇一目。剽悍陰賊。然有機智。頗識往牒。凡遇疑難。嵩躊躇未決。世蕃參綜陳說。言之可聽。嵩竊昏。且夕直西內。諸司以事關白。輒曰。與小兒議之。甚曰。與東樓議之。東樓世蕃字也。嵩妻歐陽氏賢。見嵩權勢盛。嘗謂之曰。不記鈴山堂十二年清寂耶。又謂世蕃曰。汝父辛苦起家。汝以蔭得官。蔭之爲義。庇身而已。非汝縱恣得意時也。

及歐陽氏卒。世蕃居喪。不得入直。代票擬。嵩每遣人持聞。值其方縱淫樂。不以時答。嵩自爲之。往往失旨。所進青詞。又多假他人手。不能工。以此積失帝歡。御史鄒應龍因抗疏論嵩父子不法。遂罷嵩。戍世蕃雷州。未至而返。益治園亭。乘軒衣蟒。勢焰不稍衰。袁州推官郭諫。巡按林潤謨。盡發其罪。且及寃殺楊繼盛沈練狀。世蕃喜。謂其黨曰。獄且解矣。刑部尙書黃光昇以獄詞白徐階。階曰。諸公欲生之乎。楊沈之獄。嵩皆巧取上旨。今顯及之。是彰上過也。如是諸君必不測。嚴公子驕款。段出都門矣。爲手削其草。獨按羅龍文與汪直交通。賄世蕃求官。世蕃用日者言。南昌倉地有王氣。取以治第。又結宗人典樞。陰伺非常。多聚亡命。南通倭。北通虜。甚相響應。卽日令光昇疾書奏之。世蕃聞。詫曰。死矣。遂棄市。籍其家。珍異充斥。踰於天府。嵩借居僧舍。鬱鬱而死。衆買棺殮之。是嚴氏之敗。全由徐階一人。並無受害者。之後人出而報復也。

仇鸞。鎮原人。鎮甘肅。虜酋俺答犯京師。鸞入援。兵潰。斬屍得八十級。以捷聞。帝優

詔慰鸞。加大保。總督京營。密賄俺答子托克托。使貢馬互市。馬市既開。諸邊日苦侵暴。初鸞媚嵩。不啻廝養。既恃主恩。蔑視嵩。嵩屢言於帝。節抑之。而鸞憤憤自若。會虜報益急。鸞不得已。出鎮。遇伏敗還。疽發背而死。徐階密疏鸞通虜誤國。詔錦衣衛都督陸炳。會三法司議罪。奏鸞謀反。律當追斬。得旨剖棺斬首。梟示九邊。妻子家丁皆斬。沒其貲。史載仇鸞事如此。而彈詞謂鸞實行叛逆。爲曾銑二子所平。則故甚言之矣。

林上春、羅文耀、李剛鉞、余貴賓、及退歸林下之龍閣老。史無其人。均由作者臆造。惟海剛峯則誠有之。詳見後大紅袍彈詞考。

五彩輿劇本考

五彩輿一劇。事多紀實。嚴世蕃畫地衣成棋盤。令三十二美人列作象棋。與妻對着。此事見於美新。據云。此地衣及三十二美人。爲王天華所獻。鄢懋卿妻乘五彩輿事。見明史嚴嵩傳。傳云。鄢懋卿恃嚴嵩之勢。總理兩浙兩淮長蘆河東鹽政。驟

增鹽課四十餘萬。所至市權納賄。至以文錦被廂牀。白金飾溺器。歲時饋遺權貴。不可勝紀。其按部常與妻偕行。製五彩輿。令十二女子舁之。道路傾駭。又海瑞傳云。鄢懋卿總理鹽法。巡行郡邑。勢焰甚盛。時瑞任淳安知縣。供帳疏簡。抗言貧邑不足安車軒。懋卿恚甚。然素聞瑞名。爲歛威而去。此劇實合史傳及私家紀載而成。非虛構也。惟彩輿行至淳安道上。適逢民家娶婦。互相爭道。民家誤舁彩輿而去。以致涉訟公庭。此則編劇者姑妄言之。欲使鄢奸貽臭萬年。以取快人心而已。

大紅袍彈詞考

大紅袍述海忠介公巡撫應天。摧抑豪強。平反冤獄。賴一義賊杜某爲之周旋。此皆後人臆造。非紀實也。按明史海瑞傳云。瑞字汝賢。瓊山人。以舉人任淳安知縣。布袍脫粟。令老僕藝蔬自給。總督胡宗憲嘗語人曰。昨聞海令爲母壽。市肉二斤矣。尋擢戶部主事。世宗享國日久。專意齋醮。廷臣自楊最楊爵得罪後。無敢言者。瑞上疏言陛下卽位。天下欣然望治。未久而妄念牽之。謬謂長生可得。一意修元。

陛下誤舉之。諸臣誤順之。無一人肯爲陛下正言者。諛之甚也。自古聖賢垂訓。未聞有所謂長生之說。陛下師事陶仲文。仲文則既死矣。彼不長生。而陛下何獨求之。誠一旦翻然悔悟。日御正朝。與諸臣講求天下利害。天下何憂不治。萬事何憂不理。此在陛下。一振作間而已。帝得書大怒。抵之地。顧左右趣執之。無使遁。宦官黃錦在側曰。聞此人上書時。市一棺。訣妻子。待罪於朝。童僕亦奔散。無留者。是不遁也。帝默然。少頃。復取讀之。爲感動太息。留中數月。會帝有疾。逮繫論死。帝崩。穆宗嗣位。乃釋之。歷兩京左右通政。以右僉都御史巡撫應天十府。有勢家朱丹其門。聞瑞至。黜之。中人監織造者爲減輿從。瑞銳意興革。溶吳淞白茆。通流入海。民賴其利。卒於官。無子。僉都御史王用汲入視。葛幃敝簾。有寒士所不堪者。因泣下。贖金爲殮。小民罷市。喪出江上。白衣冠送者夾岸。酹而哭者百里不絕。贈太子太傅。諡忠介。瑞生平爲學。以剛爲主。因自號剛峯。天下稱剛峯先生。後人震其氣節功名。編書傳世。然所紀事皆子虛烏有。蓋以形容其正直清廉。爲下乘禪說法而

已。

一捧雪院本考

劇演錢塘太常卿莫懷古藏古玉杯。名一捧雪。門客湯某業裝潢。嘗見之。莫薦湯於嚴介溪。湯卽以玉杯告嚴。嚴求之。莫以僞杯應。爲湯所偵知。復告嚴。嚴命窮搜之。義僕莫成藏其杯匿他所。卒不可得。莫畏罪掛冠而逃。時戚繼光鎮薊州。往依之。迨抵鎮所。而嚴氏已假他罪。坐懷古大辟。旨下薊州總兵拿斬。繼光與懷古素善。心不忍。乃縱懷古逃出關。而斬其僕莫成以代。懷古妾雪豔留戚所。繼又爲湯所偵知。言於嚴。嚴奏戚縱欽犯。逮付錦衣衛拷審。衛都督陸炳知莫氏冤。陳莫成頭於階下。令雪豔與湯對質。時湯已官經歷。見雪豔美。欲娶爲妾。因以利害脅雪豔。雪豔佯允之。湯喜。遂認莫成頭爲眞。獄解。戚繼光逮鎮所。雪豔暗藏匕首。嫁湯之夕。出不意刺湯死。而已亦自刎。嚴氏旣敗。莫懷古一家。賴戚繼光力得復合云。按此事史傳無考。而私家亦無紀載。殆寓言也。然傳諸父老。又似確有其人者。松

郡故有提標游擊而無衙署。游擊所假爲辦公所者曰莫府。云卽莫懷古故宅。宅內有藤一本。盤繞古槐樹上。粗如臂。禁不可伐。伐則液流如血注。土人謂是莫公手澤。又我邑北門外漕倉故址（今邑人租其地爲墾植公司）東側。傍河有一墳。作長方形。名雪娘墳。相傳爲懷古妾雪豔所葬處。據父老云。懷古實松江人。劇本謂籍錢塘者誤也。顧按之府縣兩志。則又毫無實據。此種掌故。殆亦等諸西安之寶劍窖。成都之蔡花墓。在若有若無之間而已。

嘗閱王弇州先生觚不觚錄。有一節云。分宜當國。子世蕃挾以行贖。天下之金玉寶貨。無所不致。其最後乃始及法書名畫。蓋始以免俗。且鬪侈耳。而至其所欲得。往往假總督撫按之勢以脅之。至有破家殞命者。而價亦驟長。分宜敗。什九入天府。觀此。則以一玉杯而陷太常全家。事亦容或有之。必以劇本爲全虛者亦非也。

白蛇傳彈詞考

白蛇傳一書。悠謬荒唐。爲世上必無之事。固盡人知之矣。然是說相傳已久。洪昉

思書湖壩雜記後。亦云。杭州舊有三怪。金沙灘有三足蟾。流福溝有大鱉。西湖有白蛇。隆慶時鱉已爲漁家釣起。蟾已爲方士捕得。惟白蛇尙存與否。不可得知。徐逢吉清波小志引小窗日記云。宋時法師鉢貯白蛇。覆於雷峯塔下。然則雷峯鎮蛇事。在宋季不在明季也。錢塘陸次雲湖壩雜記云。雷峯塔五代時所建。塔下舊有雷峯寺。今廢久矣。嘉靖時東倭入寇。疑塔中有伏。縱火焚塔。故其簷級皆去。赤立童然。反成異致。俗傳湖中有青魚白蛇之妖。建塔相鎮。士囑之曰。塔倒河乾。方許出世。崇禎辛巳。旱魃久虐。水澤皆枯。湖底泥作龜裂。塔頂煙焰薰天。居民驚相告曰。白蛇出矣。互相驚懼。遂有假怪以惑人者。後得雨。湖水重波。塔煙頓息。人心始定。編書者或因明季久旱。嘗有假怪惑人之事。故以訛傳訛。遂指白蛇出現爲明季事。亦未可知也。小窗日記所云法師。不知何名。今彈詞則以鎮白蛇者爲金山法海。昔遊金山。果見臨江之處。有法海洞在焉。中鑿石佛一尊。僉曰。此卽金山名僧法海像也。然安知不因白蛇一傳。傳世已徧。而寺僧故鑿此像以愚人者。

耶。又安知不因金山果有是僧。而編書者乃借之以實鎮蛇之人耶。予嘗思之。此書決爲釋教中人所作。蓋大叢林之僧徒。多有粗通文字者。或者湖上寺僧。見西湖舊有白蛇之說。因卽附會其事。編成此書。以見佛法無邊。愚人耳目。不然。書中叙白娘娘之妖術。何但能勝茅山之道。而不能敵金山之僧耶。此中蓋自有故焉。又明田叔成所撰西湖志餘云。杭州男女瞽者。多學琵琶。唱古今小說平話。以覓衣食。謂之陶真。大抵說宋時事。蓋汴京遺俗也。或說紅蓮柳翠濟顛雷峯塔雙魚扇墜等記。則皆杭州異事。或近世所擬作者也。然則雷峯塔事。在明時已有小說流傳。爲人彈唱。特明人所唱之雷峯塔。與今人所唱之白蛇傳。其事同否。則不得而知。雙魚扇墜。書已失傳。其事蹟猶載於西湖志餘之終卷。觀之頗與今人所唱白蛇傳初回相彷彿。姑錄於後。以資參考。

弘治間、旬宣街有少年子徐景春者。春日遊湖山。至斷橋時。日迨暮矣。路逢一美人與一小鬟同行。景春悅之。前揖而問曰。娘子何故至此。答曰。妾頃與親戚同遊

玉泉士子雜選。遂失羣。惘惘索途耳。景春曰。娘子貴宅何所。答曰。湖墅宦族。孔氏二姊也。景春遂送之往。及門。小鬟強景春入。曰。家無至親。耶君不棄。暫寄一宿何如。景春大喜。遂入宿焉。備極繾綣。以雙魚扇墜爲贈。明日。隣人張世傑者。見景春臥冢間。扶之歸。其父訪之。乃孔氏女淑芳之墓也。告於官。發之。其崇絕焉。事與許仙之遊湖借傘相類。蓋小說窠臼。大都如此也。

玉蜻蜓彈詞考（又名芙蓉洞）

玉蜻蜓述蘇州申貴生遊虎邱法華菴。與菴尼志貞通。私生一子名元宰。爲徐姓所得。由徐氏撫養成人。狀元及第。官拜文淵閣大學士。後卒歸宗還申姓。所謂中元宰者。蓋卽萬歷時閣學申時行也。按明史申時行傳云。時行字汝默。江蘇長洲人。嘉靖中進士。授修撰。萬歷五年。由禮部侍郎改吏部。以文學受知於張居正。蘊藉不立崖異。進禮部尙書。兼文淵閣大學士。繼居正柄政。務爲寬大。以次收召老成。布列庶位。朝論多之。十八年春正月元旦。帝召時行於毓德宮。宣皇長子出見。

時行請早定大計。帝猶豫久之。曰。當以後年冊立。否則俟皇長子十五歲舉行。明年工部主事張有德請具冊立儀注。帝怒。命展期一年。而內閣亦有疏入。首列時行名。時行密上封事。言臣方在告。初不預知冊立之事。聖意已定。有德不諳大計。惟宸斷親裁。勿因小臣妨大典。於是給事中羅大紘劾時行。謂陽附羣臣之議。以請立。而陰緩其事。以內交。中書黃正賓復抗章。詆時行。二人皆被黜責。時行力求罷。詔馳驛歸。子用懋。兵部尙書。用嘉。廣西參政。統觀。全傳。旅進。旅退。毫無事業。不過庸庸伴食而已。其爲私生子。無可考。惟坊間舊有狀元圖考一書。嘗購觀之。則題名確爲徐時行。是知時行幼爲徐氏撫養。乃實事也。彈詞名申氏子爲元宰者。蓋亦有故。按王弇州觚不觚錄云。諸生中鄉薦與舉子中會試者。郡縣則必送捷報。以紅綾爲旗。金書立竿以揚之。若狀元及第。則以黃紵絲。金書狀元。立竿以揚之。其他則否。萬曆戊寅。吾郡申相公入閣。報至。撫按兵道創狀元宰輔字。金書於黃旗。揭竿於門。入雲表。聞此公知之。頗不樂也。是知元宰非申公眞名。因當時黃

旗高展。狀元宰輔四字。已深入一般人之腦筋。故編書者括取元宰兩字以爲其名也。近彈詞家改申姓爲金。以彈詞家多蘇人。而申又世爲蘇州望族。不敢直指其事。故諱申姓而言金姓也。

申元宰父執沈君卿。實無其人。長江遇盜一節。乃蘇州南濠人金德宣事。編書者特假爲粉飾者也。按吳郡陸胥屏先生說聽云。南濠金德宣。正德初販豆麥於楓橋河下。一晚入酒館。忽有客來。長身偉貌。美鬚髻。金默異之。掛客共飲。歡若平生。竟與同歸。戔宿。客謂金曰。吾舟泊泚墅。須遣价引之。金從之。客俟舟至。舁雙筩。出銀二千并一簿。授金曰。荷愛長者。敢煩派此於機戶。金視之。織龍鳳衣數也。駭問何爲。曰。身是秦府儀賓也。奉殿下命辦此。時已秋杪。屈指計云。往探姻親宦閩者。初春到吳。幸預爲督成。及期已織完。舁之。客喜謝去。後金販布至湖廣。江中遇盜。金暨同伴俱就縛。劫貨將盡矣。有舸揚六帆。如飛而至。中坐衣龍袍者。惟言搬却大船來。金偶舉頭。龍袍者見之。大呼曰。長我故人。趨解紮。一行人盡得釋。挹金過

船相見。卽嚮織龍鳳衣客也。慰問良久。設席款之。奏女樂。見其妻妾四人。酒闌。召諭羣盜曰。吾自資若輩。故人物毫毛不許動。舉還之。尋語金曰。乘風浮海。未嘗沿江。昨得一姝。趁便風游衍。不覺至此。殆天假良晤也。臨別。又贈壓驚黃金一錠。衆詢知其故。皆曰。某等數千金劫去。囚君復來。德君何已。願各分半以謝。金峻却之。曰。若然則予亦盜也。衆乃止。金從此不復爲商矣。甲戌歲以解戶如南京。遇諸途。盜問其寓所。云明當參候。是日盜與某都督飲博。巡江察院潛訪擒去。金惶懼累日。聞杖死始安。今彈詞謂有盜名呂東湖者。曾在蘇州閭門。與沈君卿有一面之緣。後君卿江中遇盜。盜首卽前所識之東湖。遂與訂莫逆交。而東湖卒亦成爲善士。蓋卽本此事而略爲粉飾者也。

彈詞又謂沈君卿留東湖山上。於山後發見藏金。因拔釵置其處而祝之。後君卿家僮沈芳。端午日尋覓藥草。於草間拾得一釵。卽君卿山上所置物也。君卿歸。從拾釵處掘之。果得藏金鉅萬。此說亦有來歷。按雲間董閔石尊鄉贊筆云。華亭有

杜生者。家甚富。偶以事往京華。歸至半途。入一竹林內。登廁。回顧地罅。有金釵一股。投之。其聲鏘然。因撥去瓦礫。見下有大甕。覆以鉅磚。揭視之。皆黃白物也。杜祝曰。我單馬二童。豈能帶挈。如此物應爲我有。俟到家遣人來取。仍以釵置甕面。聚亂石識之。抵家。未能卽行。一日。納涼於庭。顧頽垣下土壘起。有物燦然。拾視。則前所識之釵也。急掘之。藏金宛然。四角鑲黃金四大錠。相去二千餘里。隨之而至。豈神輸鬼運耶。君卿事卽脫胎於此。要之玉蜻蜓一書。於中姓不無依據。沈姓則並無其人。所叙沈君卿事。皆由各種說部中搬演而成。蓋作者借爲書中之寶。以點綴成趣而已。

千里舟傳奇考

嘗見樊山先生賈郎曲有云。蘇卿早日逢雙漸。掃地添香定不辭。雙漸蘇卿。典頗冷僻。余初不知其何自出也。及考千里舟院本。而始歎此老胸中。固無書不備者。元人雜劇本有雙漸趕蘇卿一齣。劇本久失。顧其崖略。後人猶得恍惚憶之。好事

者乃憑空摸索。敷衍成書。且借隆萬間有名人物。增入書中。謂是明季事實。以雙漸之舟。得有神助。一日千里。故名其書爲千里舟。實則驅李代桃。攜槐補柳。入既烏有。事亦子虛。惟假以敷佐諸人。爲稍有來歷耳。

是書略謂雙璧字藍田。江西南昌人。官登卿貳。告歸林下。娶妻夏氏。子雙漸字雲鴻。年二十。齋銀五萬兩。遊學金陵。偶步桃葉渡。與松江女子蘇卿相遇。一見目成。蘇卿母早亡。父天挺官廉訪。時赴任陝西。卿隨行。至黃河。金龍四大王怒天挺渡河不祭。傾覆其舟。天挺扶船板得渡。仍赴任所。卿得青樓中人蘇媼撈救。強使操淫業。卿不允。媼賄女巫關亡。詭云廉訪已死。囑女順從。適雙漸囑友柳奉卿胡思傳覓豔。柳胡見卿貌美。乃與媼勾合。使僞稱母女相依擇婿者。遂漸往賃其園。漸從之。見卿侍婢元霜。贈以詩扇。曰。朱樓天半鎖葳蕤。樹影閒遮花影垂。吟罷新詩無一語。東鄰盼斷眼迷離。卿見詩扇書款。知賃室者爲雙漸。乃偕元霜往見。甫坐談。媼忽至。責以誘污良家。迫進二萬金爲聘禮。使入贅。既成婚。卿叙顛末始悉。媼

非生母。漸貲罄。緘致母所索銀。母私與五萬。遂爲卿建園亭。貲復罄。遣僕青紺歸索銀。父悉其子淫蕩。欲親往金陵責之。母命青紺急至漸所。囑遠避。卿私贈銀五十兩。衣一篋。匆遽別去。江西茶商馮奎慕卿名。以銀二萬。挽柳胡聘卿爲妾。媼貪其利。恐卿不從。僞以貝葉菴進香爲辭。促卿及元霜登舟。舟卽馮商販茶者也。馮旣得卿。卽揚帆駛浦口。卿堅志不從。過金山。入寺焚香。卿留書僧舍。託寄江西雙生。時漸已狀元及第。告假至金陵。亦過金山寺。距卿去纔數日。寺僧詢知姓名。以書與漸。始悉卿爲馮商娶去。一至杭州。卽當自盡。計卽日卿當抵杭。須於是日趕到。纔可得救。因命舟子前駛。時四金剛奉佛敕。雙漸蘇卿係玉女金童謫降。須運神力護送。舟一晝夜行千里。迫及茶船於塘棲。夜見蘇卿。暗攜入舟。西元霜以石投河中。詭云蘇卿赴水。馮商驚喊。爲差官擒見。浙撫。撫卽卿父天挺。由陝臬升擢者也。詢元霜。具悉顛末。時漸父雙璧已由太僕卿擢閩撫。距浙不遠。卿漸各得復見父母。俱大喜。乃發馮商邊遠充軍。茶船籍沒。考明隆萬間卿貳中人。無有名雙。

璧蘇天挺者。爲作者臆造無疑。惟叙秦淮名妓。引及馬湘蘭。名士則引及王鳳洲。此皆確有其人。馬湘蘭爲萬歷初年金陵名妓。豪俠且有詩名。與蘇州老名士王穉登最善。嘗欲嫁之。賓白中所云王百穀者。卽穉登也。王鳳洲亦嘉靖隆慶間人。與楊椒山交最善。尙氣節。能文章。或云金瓶梅鳳鳴記等書。皆其所著。作者欲指千里舟爲隆萬間事。故假兩人以實之。然其結尾兩語云。茶船久撥琵琶調。編出新詞逸韻飄。則係舊事翻新。無可疑也。

臨川夢傳奇考

此亦蔣清容先生藏園九種曲之一也。清容先生秉性峭直。不苟隨時。由進士官編修。以剛介爲和珅所抑。留京師八年。無所遇。以母老乞歸。其才其遇。無一不與臨川相類。因爲臨川夢傳奇以自況焉。其自序略云。先生以生爲夢。以死爲醒。予則以生爲死。以醒爲夢。於是引先生既醒之身。復入於既死之夢。且令四夢中人。與先生周旋於夢外之身。不亦荒唐可樂乎。是二公皆工於說夢者。嗟乎。才人寡

合。今古同悲。清容之寫臨川。實借他人酒杯。澆自己塊壘。宜其異曲同工。臨川書分上下二卷。前後凡二十齣。敘臨川早登賢書。萬歷五年。公車北至。臨川名。欲以是科榜眼。位置己子嗣修。而更訪天下才人。以與狀元探花。名。命族叔張不癡潛往關說。使投江陵門下。許以大魁。臨川以病力辭。致不應春闈而返。先是華亭陳繼儒借隱逸爲名。交結公卿。廣通聲氣。臨川嘗面斥其奸。繼儒銜之。日於名公卿前媒藥其短。臨川以是再赴春闈。蹭蹬不售。至是已三上公車矣。而江陵又欲招之門下。臨川以書之富貴。義不可受。負氣而歸。由是閉門著述。以詞曲自娛。作四夢傳奇。舒寫懷抱。有婁江俞二姑者。幼喪父母。終鮮兄弟。家中祇有乳母爲伴。年十七。聰明嬌豔。喜讀新曲。見臨川所著牡丹亭。悅之。手加批註。命乳母出訪著書之人。適鄰居張許二孝廉公車北上。乳母託使訪之。時臨川家居六載。江陵已死。復應春闈。始中進士。以不登張四維申時行兩相之門。斬其館職。僅除南京太常寺博士。臨川殊不介意。卽時赴任。張許以是歸告乳母。

乳母以告二姑。二姑一往情深。誓非臨川不嫁。萬歷十九年。朝廷以星變詔求直言。臨川應詔上疏。力言閣臣申時行潛移魁柄。蒙蔽聖聰。朝廷震怒。貶廣東徐聞典史。未幾。昇浙江遂昌縣令。縣有虎患。臨川牒城隍神。使助擒虎。斃之。萬歷二十六年。致仕家居。時二姑思感成疾。死已數年。乳母以二姑臨終重託。袖其手評牡丹亭本。訪問臨川。不得一見。至是聞已家居。因搭舟直造其廬。以評本授臨川。哭訴二姑死狀。臨川驚歎。卽日打掃南樓。祀奉二姑木主。使人往蘇購置墓田。以供祭掃。其乳母遂依臨川以終。又萬歷二十年。時拜子承恩據寧夏叛。御史麻城梅國植薦李如松爲將。而國植監其軍。討平之。國植爲臨川至友。且又同年。故作者旁及之。爲設時叛遣跛雙嚙三齣。

按湯顯祖本傳。略云。顯祖字義仍。一字若士。江西臨川人。生而有文。年二。一舉於鄉。忤陳繼儒。遂以媒藥下第。再試。張居正欲其子及第。羅致海內名士。以張之。延顯祖及沈懋學。顯祖謝勿往。懋學乃偕居正子嗣修及第。迨居正歿。始成

進士。與時宰張四維申時行子爲同年。二相招致之。不往。除南京太常博士。久之。遷祠部。十九年。以星變抗疏劾政府。伉直數千言。謫徐聞典史。立貴生書院講學。士習頓移。陞遂昌知縣。滅虎放囚。誠信及物。翕然稱循吏。二十六年。授劾歸。不復出。後三年。外計。追論議黜之。李維禎爲監司。立爭曰。此君高尚久矣。不應考法。主計者曰。正欲成其高耳。竟削籍。里居二十餘年。父母喪時。顯祖已六十七齡。明年。以哀毀卒。遺命以麻衣草屨斂。所善同邑帥機李三才。梅國楨。李化龍。後皆通顯。各有建樹。論文以宋濂爲宗。斥李夢陽。王世禎爲僞體。所居玉茗堂。文史狼籍。雞埒豕圈。雜沓庭戶。蕭閒詠歌。俯仰自得。胸中塊壘。發爲詞曲。所著四夢。雖流連風懷。感激物態。要於洗蕩情塵。銷歸烏有。作達觀空。亦可悲矣。(下略)

哮喘一譯巴拜。故韃鞨種。嘉靖中。以得罪酋長來降。立戰功。官都指揮。及老。加副總兵。致仕。子承恩襲職。性狼戾。拜雖老。多蓄亡命。十九年。洮河告警。拜請與子承恩出師。巡撫黨孽。惡其自薦。抑損之。又以承恩娶民女爲妾。笞之二十。拜父子怨。

甚。會戍卒衣糧久勿給。拜遂喉軍。鋒劉東暘許朝等作亂。殺馨及副使石繼芳。逼總兵張維忠自縊死。東暘自稱總兵。奉拜爲謀主。承恩朝爲左右副將。遂陷玉泉營。及廣武河西四十七堡。惟參將蕭如薰守平魯不下。射殺拜寄子布延。(布延又譯哮雲) 拜結套部車哩克圖爲助。勢甚猖獗。御史梅國楨薦李松忠勇可任。遂令如松總寧夏兵。國楨監之。初總督魏學曾與甘肅巡撫葉夢熊定計。決黃河大壩水灌城。賊懼。陽求撫以緩我師。而仍結套虜爲助。如松等擊卓哩克圖。追奔至賀蘭山。賊援始絕。而城受浸益大圯。食且盡。國楨用間給東暘朝承恩。使互相殺以降。貫其罪。三人互猜疑。東暘朝遂誘殺承恩。黨士文秀承恩與其黨周國柱亦誘東暘朝殺之。開門降。如松率兵國巴拜宅。拜自縊死。俘承恩至京師磔之。通鑑所記如是。傳奇哮叛諸齣。蓋紀實也。

療妒羹院本考

療妒羹演維揚才女喬小青嫁武林馮生爲妾。大婦不容。分院以處小青。而阻其

夫使不得復見。馮戚有楊夫人者。憐而臨問焉。嘗假書與讀。小青最喜牡丹亭曲。爲譜新詞題之。後卒齋恨而歿。此事豔絕千古。後之文人皆樂道之。或謂小青兩字。蓋拆情字爲之。並無其人。乃文人好事者所寓言耳。然考愚山詩話云。小青詩盛傳於世。或謂實無其人。蓋拆情字爲小青耳。予至武林。詢之陸麗京。陸曰。此故馮具區之子雲將妾也。所謂楊夫人者。進士楊廷槐元蔭妻也。楊與馮爲親舊。夫人雅諳文史。故相憐愛。頻借書與讀。嘗欲爲作計。令脫身他歸。小青不可。及夫人從官北去。小青貽書爲訣。書中云云。皆實錄也。小青以命薄甘死。寧作霜中蘭。不作風中絮。豈徒以才色動哉。余謂小青固能詩者。恐不免文人潤色。陸曰。西湖上正少此捉刀人。據此則小青確有其人。宜乎一坏荒土。點綴西湖。至今遊孤山西畔。撫讀遺碑。猶令人低徊不置也。小青貽楊夫人書。余嘗於名媛尺牘中見之。爲錄於左。

貽楊夫人書

元元叩首灑血致啓夫人台座下。關頭祖帳。迴隔人天。官舍良辰。當非寂度。馳情感往。瞻睇慈雲。分煥嘯寒。如依膝下。糜身百體。未足云酬。娣娣姨姨無恙。猶憶南樓元夜。看燈諧謔。姨指畫屏中一憑欄女曰。是妖嬈兒倚風獨盼。恍惚有思。當是阿青。妾亦笑指一姬曰。此執拂狡鬢。儻近郎側。將無似娣。於時角彩尋歡。纏綿徹曙。寧復知風流雲散。遂有今日乎。往者仙槎北渡。斷梗南樓。猜語哮喘。日焉三至。漸乃微詞含吐。亦如尊旨云。竊撥鄙衷。未見其可。夫屠肆婆心。餓狸悲鼠。此直供其換馬。不卽辱以當墟。去則弱絮風中。住則幽蘭霜裏。蘭因絮果。現業誰深。若便祝髮空門。洗妝浣慮。而豔思綺語。觸緒紛來。正恐蓮性雖胎。荷絲難殺。又未易言此也。乃至遠笛哀秋。孤燈聽雨。雨殘笛歇。謾謾松聲。羅衣壓肌。鏡無乾影。晨淚鏡潮。夕淚鏡汐。今茲雞骨。殆復難支。痰灼肺燃。見粒而嘔。錯情易意。悅憎不馴。老母娣弟。天涯問絕。嗟乎。未知生樂。焉知死悲。感促歡淹。無乃非達。妾少受天穎。樓警靈速。豐茲齋彼。

理詎能雙。然而神爽有期。故未應寂寂也。至其淪忽。亦非自今。結襦以來。有宵靡日。夜臺滋味。諒不殊斯。何必紫玉成煙。白花飛蝶。乃謂之死哉。或軒車南返。駐節維揚。老母惠存。如妾之受。阿秦可念。幸終垂憫。疇昔珍贈。悉令見殉。寶鈿繡衣。福星所賜。可以超輪消劫耳。然小六娘竟先期相候。不憂無伴。附呈一絕。亦是烏語鳴哀。其詩集小像。託陳媪好藏。覓便馳寄。身不自保。何有於零膏冷翠乎。他時放船隄下。探梅山中。開吾西閣門。坐吾綠陰牀。髣生平於響像。見空幃之寂颯。是耶非耶。其人在斯。嗟乎夫人。明冥異路。永從此辭。玉腕朱顏。行就塵土。興思及此。慟也何如。元元叩首叩首上。

由前之說。小青固確有其人。然其姓氏卒無可考。院本以爲喬姓。喬者假定之謂。因其無姓。故以喬字冠之。猶伯牙之爲俞姓。乃後人臆造者耳。余嘗往遊西湖。見於孤山北麓。地窪而將爲水嚙之處。有亭翼然。修理甚整。卽小青埋骨處也。讀其碑記。乃一滿州命婦歸覺羅小拉木氏。於清光緒十三年重修小青墓時所撰。記

於小青原委亦未詳悉。第云小青爲明季維揚閨秀。相傳能棋工詩。而姓氏不彰。嫁後不爲大婦所容。致齎恨以歿云云。則其母家之姓。終無可考。近觀邱菽園先生所著贅談云。小青虎林馮氏姬也。本姓馮。因歸馮故諱之。此說不知何據。恐亦得諸傳聞。非確證也。療妒羹三字出南史。梁武帝平齊。獲侍兒十餘輩。帝悅之。郗后憤恚成疾。左右曰。山海經云。鷓鴣肉止妒。乃作羹以食郗后。妒果減半。院本以是爲名。義蓋取此。

檣杵閒評考（一名明珠緣）

檣杵一書。敘逆閹魏忠賢與奉聖夫人客氏。紊亂朝致。毒害忠良。謀傾明社。種種罪惡。令人髮指。作者恐後人氣不能平。因借因果之說。謂魏客前身。實係淮河二蛇。嘗助治水有功。治河者不奏聞於朝。請給封典。反火其穴而殲之。二蛇因是率其族類。投胎爲人。雄者爲魏。雌者爲客。餘則爲其同黨。所傷善類。蓋卽當日河工中人所轉生者也。此與撰岳傳者同一命意。蓋非此不足平閱者之心。而爲一般

普通人說法也。

是書以客魏爲兩蛇後身。欲敍客魏之作奸。不得不先敍河工之治水。水患之來。亦必有自。因借水怪巫支祈爲引線。巫支祈事。荒誕不經。然有來歷可考。按古岳瀆經云。禹治水三至桐柏山。驚風迅雷。石號木鳴。五伯擁川。天老肅兵。不能興。禹怒。召集百靈。囚鴻蒙氏。商章氏。兜氏。盧氏。犁婁氏。乃獲淮渦水神。名巫支祈者。善應對言語。辨江淮之淺深。原隰之遠近。形如猿猴。縮鼻高額。青軀白首。金目雪牙。頸伸百尺。力逾九象。搏擊騰蹕。疾奔輕利。倏忽間視不可久。童律烏木田均不能制。惟庚辰能制之。頸鎖大索。鼻穿金鈴。徙之淮陽之龜山足下。俾淮水安流注海也。後人皆圖庚辰之形。以免淮濤風水之患。今巫支祈井。在盱眙縣東北龜山寺後。客其地者類能言之。至云唐德宗時。巫支祈又出爲患。幸爲觀音大士所獲。仍鎖龜山潭底。至明嘉靖年間復出。而洪水滔天。幾致不可收拾。此皆無稽之談。作者特借此波瀾。徐徐引入。爲二蛇發現張本耳。

朱衡治河。爲明隆慶六年事。書言嘉靖年間者誤也。史載隆慶四年。河決邳州。自睢寧白狼淺至宿遷小河口。淤百八十里。漕道復阻。河道侍郎翁大立言。邇來河患。不在豐沛而在徐邳。臣以爲權宜之計。在棄故道而就新衝。經久之策。在開泇河以避洪水。帝命大立躬自相度。條利害以聞。已而大立以謬漕削籍。六年正月。命朱衡經理河道。衡罷泇河議。於徐邳築長堤。自徐州至宿遷小河口三百七十里。并繕豐沛大黃堤。正河安流。運道復通。作者因之。遂言朱衡之功。蛇實助之。而衡反焚毀蛇穴。以致客魏之毒。徧於天下。此皆作者寓言。以此咎衡。衡不任咎也。泰山女神碧霞元君。相傳爲泰山之女。碧霞之號。錫自宋時。而泰山女之說。西晉以前已有之。張華博物志云。文王以太公望爲灌壇令。期年風不鳴條。文王夢見一婦人甚麗。常道而哭。問其故。曰。我東海泰山神女。嫁爲西海婦。欲東歸。灌壇令當吾道。以其有德。吾不敢暴風疾雨過也。文王夢覺。爲召太公。三日三夕。果有疾風驟雨自西來也。文王乃拜太公爲大司馬。又干寶搜神記云。後漢胡毋班嘗至

泰山之則。爲泰山府君所召。令致書於女婿河伯。云至河中流。扣舟呼青衣。當自有取書者。班如府君教果得達。復爲河伯致書府君。此二事皆泰山山女之證也。說出顧寧人先生山東考古錄。則碧霞元君之爲水神。自昔云然矣。宜檣杪附會其說。謂能收服水怪。永鎮黃河也。

是書所述魏忠賢事。一宗於史。惟其若父若母。及幼時種種無賴行爲。無可證實。或爲作者所臆造。然忠賢之爲無賴。史固言之。按明史本傳云。忠賢肅寧人。少無賴。與羣惡少博。不勝。爲所苦。悲而自宮。是作者所云。非盡無據。或當時私家紀載。尙有言其瑣屑之事。爲編書人作資料者。亦未可知。今特不獲見耳。至忠賢入宮以後。種種事實。史皆載之。如通客氏。害王安。禍東林。殺妃嬪。築三殿。建生祠。凡諸惡劇。載在史冊。班班可考。卽武永春吳養春劉鐸三獄。亦見忠賢本傳。武永春爲武長春之誤。忠賢傳云。遼陽男子武長春遊妓家。有妄言。東廠禽之。許顯純掠治。故張其辭。云長春敵問。不獲且爲亂。賴廠臣忠智立奇勳。詔封忠賢姪良卿爲肅

寧伯。賜第宅莊田。頒鐵券。又云。編修吳孔嘉與宗人吳養春有讐。誘養春僕告其主。隱占黃山。養春父子瘐死。忠賢遣主事呂下問。評事許忠吉。先後往徽州籍其家。株蔓殘酷。知府石萬程不忍。削髮去。徽州幾亂。又云。閣黨都督張體乾誣揚州知府劉鐸代李承恩謀釋獄。結道士方景陽誣忠賢。鐸竟斬。談往一篇。爲明季人所撰。中敘劉鐸冤獄甚詳。謂實奸相馮銓所構。

檣杵謂客氏生時。口銜明珠一顆。其母初已許配忠賢。後與忠賢相失。改嫁侯氏。嫁後又與忠賢遇。通焉。臨別以明珠爲贈。忠賢落魄。以珠典於涿州質庫。及入宮得志。客氏向索所贈之珠。忠賢下札涿州。求所典珠。適質庫爲翰林馮銓所設。因獻珠得資緣入相。馮銓獻珠事無可考。然其資緣固無可掩也。明清之際。有署名花村看行侍者者。不知何許人。著談往一卷。中有黑頭援立一則。敘馮銓事甚詳。爲節錄之。銓涿人也。少年入詞林。美容止。涿去京師百餘里。宮中歲敬事涿郡娘娘。即碧霞元君。中官進香者絡繹。銓因得交中官。私入皇城西苑。天啓四年春。

逆賢進香涿州。時馮被劾家居。跪謁道次。送迎供帳之盛。傾動一時。且涕泣陳父
盛明之冤。爲東林陷害。逆賢憐其媚。心許之。後都憲楊漣劾賢二十四罪。賢窘甚。
內營救於客氏。復求助於外廷。馮因具書於賢姪良卿。言外廷不足慮。教之行廷
杖。興大獄。以劫制之。又時刺外廷事密報賢。使爲之備。賢感之刺骨。及汪文言再
入詔獄。馮與霍維華輩羅織多人。密封付良卿轉送賢。賢令李朝欽輩拆念。聽畢。
付東廠。暗授許顯純一一施行。時有人著買遼東傳一書。其四十八回爲馮布政
父子奔逃。卽指銓父盛明事。銓恥而恨之。侍講筵時。以此傳出袖中面奏。致熊正
法。楊州知府劉鐸嗜酒。能文善畫。丙辰廷對。以過醉致失鼎甲。識者已知其疏放。
雖令終矣。適雉阜僧壁。上粘五七言律詩。俱歐陽暉書撰。不過借鐸圖書私用耳。
馮私人霍維華輩視爲奇貨。喉田爾耕借緝事入告。鐸遂不免。人知事由王體乾。
孰知造謀弄江右人者。亦馮發端乎。逆賢故妻馮氏。雖流寓肅寧。初亦涿籍。因疑
馮銓爲遠族。值銓侍講筵。賢輒默默屬目。有徵時故劍之思。用馮之故。其在此乎。

談往敘馮銓賚緣事。其要如此。餘從略不錄。觀此則逆賢未遇時固嘗娶妻。乃馮氏非傅氏也。檣杌謂逆賢嘗贅傅家爲婿。生應星。豈賢未闢時曾一娶再娶耶。

奸黨之輔忠賢以攻善類。始於三案。三案事頗複雜。今據各人列傳以略述之。萬歷中鄭貴妃專寵。光宗雖爲皇長子。而儲位未定。朝臣疑貴妃欲立己子福王。請建儲者無慮數十百疏。迨光宗既爲太子。猶孤危無依。故朝臣請福王之國者又數十百疏。福王己之國矣。四十三年五月四日。忽有人持棗木槌入慈慶宮。（光宗爲太子時所居）擊傷門者。至前殿。爲內侍所執。皇太子奏聞。巡城御史劉廷元訊其人。名張差。語無倫次。狀似瘋癲。移刑部。將以瘋癲具獄。提牢主事王之寀密訊其人。名張五兒。有馬三舅。李外父。令隨一老公至一大宅。亦係老公家。教以遇人輒打死之。案錄其語。明日刑部覆訊。馬名三道。李名守才。引路老公係龐保。大宅老公係劉成。保成皆鄭妃宮內人也。中外藉藉。皆疑妃謀弒太子。爲福王地。帝心亦動。貴妃窘。自乞哀於皇太子。帝御慈寧宮。太子及三皇孫侍。召閣臣朝臣

入。極言我父子慈愛。以釋羣疑。命礫差保成三人。無他及。羣臣出。帝意中變。命先戮差。恐保成事連貴妃。付法司刑訊。益滋口實。乃斃於禁中。三道守才遠流。其事遂止。此挺擊一案也。見張問達王之案等傳。檣杌以禽張差之內侍爲卽忠賢。張王等傳不載。然忠賢傳有云。其年敍門功。加恩三等。庶都督同知。又蔭其族魏志德都督僉事。則其說似亦有據也。光宗卽位。數日卽病痢。中官崔文昇進利劑。益劇。鴻臚寺官李可灼進藥稱仙丹。帝召閣臣方從哲韓爌等。入受顧命。言病源甚悉。命可灼進藥。諸臣皆不敢決。可灼遂進一丸。帝稍覺舒暢。諸臣退。帝又命進一丸。明日天未明。帝崩。此紅丸一案也。事具韓爌傳。光宗卽位。選侍李氏爲鄭貴妃。請封皇太后。帝允之。時外廷傳言貴妃進美女。致帝病。御史楊漣劾崔文昇用藥無狀。并請帝愼起居。因及鄭妃不宜封太后。越三日。帝召大臣并及漣。數目視漣。毋聽外間流言。遂逐文昇。且停太后封。漣自以小臣受顧命。誓死報。帝崩。漣催閣部大臣同入臨。畢。閣臣劉一燝問羣奄。皇長子何在。東宮伴讀王安曰。爲李選侍

所匿耳。一爆大呼。誰敢匿新天子者。安入白選侍。命皇長子出。一爆等呼萬歲。掖升輦。至文華殿。先正太子位。時選侍在乾清宮。一爆謂太子不可與同居。奉居慈慶宮。周嘉謨左光斗等疏請移宮。光斗疏有武氏語。選侍怒。欲召太子。加光斗重譴。漣正色謂諸奄。太子已爲天子。選侍何得召。選侍不得已。移熾鸞宮。帝還乾清。此移宮一案也。事具劉一爆楊漣左光斗傳。挺擊自龐劉死。浮議已息。王之寀時爲徐紹吉劾去。及之寀復官。追理前事。上復讐疏。謂此事何等大變。乃以瘋癲蔽獄。朦朧具辭。實緣外戚鄭國泰私結刑官。謀爲大逆耳。此挺擊案爭端之始也。光宗崩。閣臣方從哲稟擬賞李可灼銀幣。御史劾可灼。乃改令。可灼引疾歸。已而孫慎行入朝。追劾從哲。謂可灼非太醫。紅丸是何藥。從哲乃敢使進御。應坐弑逆之罪。王紀鄒元標等疏繼之。黃克纘等爲從哲辨。此紅丸案爭端之始也。選侍移宮時。李進忠（魏忠賢初名）劉朝田詔等盜金寶。過乾清門而仆。帝下法司案治。諸奄懼。則揚言帝薄待先朝妃嬪。致選侍移宮日。跣足投井。以搖惑外廷。賈繼春遂

上安選侍書。黃克繼附和之。帝怒。削繼春籍。已而帝漸忘前事。王安爲魏忠賢排死。朝詔等上書辨寃。得無罪。於是繼春等起用。倚奄勢。與楊漣等爲難。此移宮案爭端之始也。三案本各有其是。倪文正公元璐論此三案。謂主梃擊者力護東宮。爭梃擊者計安神祖。主紅丸者仗義之辭。爭紅丸者原情之論。主移宮者弭變於幾先。爭移宮者持平於事後。各有其是。不可偏非。此說最得情理之平。惜當時昧於此旨。爭論過激。遂爲逆阉利用。宵小求進。善類誅夷。均由三案。亦可悲矣。

逆阉雖借三案殺人。而禍實始於汪文言一獄。事詳魏大中傳。

逆阉生祠之建。始於浙撫潘汝楨。汝楨徇機戶之請。建祠西湖。疏聞於朝。詔賜名普德。此天啓六年六月事也。自是諸方效尤。幾徧天下。爲列表於左。使閱是書者得參考焉。

建祠地

建祠人

建祠歲月

浙江西湖

浙撫潘汝楨

天啓六年六月

南京

孝陵衛指揮李之才

六年十月

宣府(各一祠)

宣大總督張樸宣大巡按張素養
宣府巡撫秦士文

七年正月

蘇州虎邱

應天巡撫毛一鷺巡撫王珙

七年正月

景忠山

薊遼總督閻鳴泰順天巡撫劉詔
巡按倪文煥

七年二月

大同

宣大總督張樸巡按張素養大同
巡撫王點

七年二月

密雲丫髻山
昌平通州

薊督閻鳴泰巡按倪文煥梁夢環
(二處各建一祠)

七年三月

房山

太僕寺卿何宗聖

七年三月

寧前

薊督閻鳴泰遼撫袁崇煥

七年四月

五臺山

宣大總督張樸山西巡撫曹爾禎
巡按劉宏光

七年四月

蕃育署

翰林院庶吉士李若琳

七年四月

盧溝橋

工部郎中曾國禎

七年四月

宣武門外

通政司經歷孫如洌順天府尹李春茂

七年五月

崇文門

戶部主事張化愚

七年五月

延綏

陝西巡撫朱童蒙

七年五月

順天府

巡城御史黃憲卿王大年汪若極張樞智鋌

七年五月

京師藥王廟

武清侯李誠銘

七年五月

五軍營大教場

保定侯梁世勳

七年五月

山東蓬萊閣寧海院

登萊巡撫李嵩山東巡撫李精白

七年五月

河間

督餉尚書黃運泰保定巡撫張鳳翼提督學政李蕃順天巡按倪文煥

七年五月

天津

同上

七年五月

開封

河南巡撫郭增光巡按鮑奇模

七年五月

良牧嘉蔬林衡三署

上林監張永祚

七年五月

都督府錦衣衛

博平侯郭振明等

七年五月

淮安

總漕尙書郭尙友

七年六月

順天府

順天巡按盧承欽卓邁（二人各建一祠）

七年六月

山東

山東巡按黃憲卿

七年六月

天津

長蘆巡鹽龔萃庸

七年七月

揚州

淮揚巡按許其孝

七年七月

南直

應天巡按宋禎漢

七年七月

陝西

陝西巡按莊謙

七年七月

濟寧

總河李從心總漕郭尙友東撫李精白巡按黃憲卿巡漕何可及

七年八月

武昌 承天 均州

湖撫姚宗文鄖撫梁應澤湖廣巡按溫臯謨（二處各建一祠）

七年八月

固原 太白山

三邊總督史永安陝撫胡廷晏巡按莊謙袁鯨

七年八月

高觀山

楚王華奎

七年八月

河東

山西巡撫牟志夔巡按李燦然劉宏光

七年八月

一祠之費。多者數十萬。少者數萬。剝民財。侵公帑。伐樹木無算。開封建祠。致毀民舍二千餘間。宮殿九楹。儀如帝者。朱童蒙建祠延綏。用琉璃瓦。詔建祠薊州。金像用冕旒。凡疏詞掄揚。一如頌聖。稱以堯天帝德。至聖至神。而閣臣輒以駢語褒答。中外若響應。黃運泰迎忠賢像。五拜三稽首。拜階下亦如之。已詣像前。祝稱某事。賴九千歲扶植。稽首謝。某人荷九千歲拔擢。又稽首謝。還就班。復稽首如初。監生

陸萬齡至謂孔子作春秋。忠賢作要典。孔子誅少正卯。忠賢誅東林。宜建祠國學。與先聖並尊。司業朱之俊輒爲舉行。會熹宗崩乃止。最後巡撫楊邦憲建祠南昌。毀周程三賢祠益其地。毀澹臺滅明祠。曳其像碎之。比疏至。莊烈帝已卽位。且闕且笑。忠賢覺其意。具疏僞辭。帝輒報允。無何。忠賢誅。諸祠悉廢。凡建祠者概入逆案云。

關黨盛時。內豎白王體乾外。又有李朝欽、王朝輔、孫進、王國泰、梁棟等三十餘人。爲左右擁護。外廷文臣。則崔呈秀、田吉、吳淳夫、李龍、倪文煥、主謀議。號五虎。武臣則田爾耕、許顯純、孫雲鶴、楊寰、崔應元、主殺戮。號五彪。又吏部尙書周庭秋、太僕少卿曹欽程等號十狗。又有十孩兒、四十孫之號。爲呈秀輩門下者。又不可勝數。自內閣六部至四方督撫。徧置死黨。事詳魏闈本傳。崇禎時分六等定逆案。陵遲者二人。忠賢客氏也。首逆同謀決不待時者六人。崔呈秀、魏良卿、客氏子侯國興、太監李文貞、李朝欽、劉若愚也。交結近侍。秋後處決者十九人。劉志選、梁夢環、倪

文煥、田吉、劉詔、薛貞、吳淳夫、李夔龍、曹欽程、許志吉、孫如洌、陸萬齡、李承祚、田爾耕、許顯純、崔應元、楊寔、孫雲鶴、張體乾也。結交內侍、次等充軍者十一人。魏廣微、周應秋、閻鳴泰、霍維華、徐大化、潘汝禎、李魯生、楊維垣、張訥、郭欽、李之才也。又次等論徒三年、贖爲民者。大學士願秉謙、馮銓、張瑞圖、來宗道、尙書王紹徽、郭允寬、張我續、曹爾禎、孟紹虞、馮嘉會、李春晷、邵輔忠、呂純如、徐兆魁、薛鳳翔、孫忭、楊夢袞、李養德、劉廷元、曹思誠、南京尙書范濟世、張樸、總督尙書黃運泰、郭尙友、李從心、巡撫尙書李精白等一百二十九人也。減等革職閒住者。大學士黃立極等四十四人。忠賢本族及內官黨附者。又五十餘人。案既定。其黨日夜謀翻。賴帝持之堅。不能動。福王時。阮大鍼起用。其案始翻云。事具崔呈秀傳。

忠賢甥傅應星仕至左都督。獨不與逆案。或定案時已前死。亦未可知。作者因之。謂應星不願從奸。卒從空空兒仙去。此妄言也。且謂應星實忠賢之子。爲忠賢前妻傅氏所生。此說頗有來歷。忠賢傳云。其年敍門功。加恩三等。磨都督同知。擢傅

應星爲左都督。且旌其母。因母見旌。遂有以應星母爲忠賢前妻者。亦疑案也。

耳新八卷。分類三十有四。爲明季鄭仲夔所撰。敘魏闡時事頗詳。爲錄數則於左。以資參考。其正氣類云。浙撫首建逆祠。請文於樊學憲良樞。樊稱疾不出。知己更請於顧輔。(秉謙)始出衡文。祠成。各官趨謁。樊稱舊疾復作。卽日掛冠歸。副使耿如杞以不拜逆祠被逮。登檻車。士民哭送至百里外。至京坐大辟。高攀龍以劾奸削籍。杜門著書。聞緹騎至。焚香沐浴。寫書一通。整衣冠。望闕拜。自投於池。遺疏云。臣雖削籍。舊屬大臣。大臣不可辱。辱大臣則辱國矣。謹北面稽首。以效屈平之遺君恩未報。願結來生。閩有魏姓士人。佚其名。恥與魏闡同姓。乃去鬼稱。委彼儼然朝紳。而稱祖爺殿爺。歌功誦德。雷同附和者。聞此直當羞死耳。魏大中就逮。道常州。知府曾櫻泣送。大中曰。臣子死於王家。男兒常事。何必爾。贈百金。堅不受。曰。譬嫠婦孀居數十年。垂死時偶動一念。便屬失節。簣雖華。不敢不易也。及受刑。未死。以蒲捲體倒豎之。三日啓視。目猶爛爛。子學淨扶柩歸。一慟而絕。周順昌聞逮。卽

收束書帙。拜別宗祠。禁妻孥哭泣。毅然登車。及下鎮撫司。極刑捶楚。骨斷皮開。血濺肉飛。身無肌理。周齧指。睜目不作一哀泣聲。惟罵不絕口。臨死具短章。祈以屍諫。不果。後家人領埋。皮肉已腐。止存頭顱鬚髮。英氣凜冽。尙自逼人。周宗建逮獄。備極慘毒而斃。音未至家。有舟子於清江浦。接秀才來僱舟。許價一金。問姓氏及所從來。云我周季侯也。自京師出。問吳中諸大臣違京狀。秀才擊蹙曰。俱死。甚慘甚慘。問魏監曰。伊罪惡貫盈。不久被顯戮矣。至吳江曰。爾隨往我家取金。舟子如言。至門。秀才先入。待久不出。尋管家。具言故。管家曰。此吾主人名字。渠被逮赴京。存亡未卜。安有此事。喧嚷間。夫人出問故。曰。良然。昨夜半夢侍御來家。自稱備極苦刑以死。上帝鑒忠直。俾爲神蘇州。今自清江浦來。信也。言未終。號泣不勝。舉家皆哭。舟子亦哭。與舟資不受。夫人曰。侍御生而介。汝不受值。是令其死後有諸責也。乃受金太息而去。李應昇爲曹欽程構害。曹罷歸後。不爲鄉人所容。所至爭唾其面。嘗買宅湖口縣。湖口士人屏逐之。奉李神主於中。顏曰。李仲達先生祠。詔毀。

蘇州逆祠時。有一人先入。劈忠賢首。懷之去。衆阻之。曰。吾生不能啖其肉。寢其皮。今將沉香首碎碎劈開。燃向各忠臣前。庶快人心耳。其懿好類云。楊漣被逮時。士民仗義。欲奪之德安門外。集至數萬。府道開諭不散。楊帶刑叩頭。乞父老勿噪。恐累族誅。然後解。各州縣爲私禱。生還者數百處。士民送之。就道者萬計。菜餚乞兒爭持一錢。以助贖。官紳亦感泣。爲出資設奠。禱於關帝廟。河南經過州邑。無不爲之請禱。自備資糧。送至黃河者千計。逆關旣死。死忠者並得昭雪。加贈廕。高攀龍太子太保。兵部尙書。周起元兵部侍郎。周順昌太常寺卿。楊漣左都御史。吳裕中周宗建黃尊素李應昇夏之令俱太僕寺卿。萬燝光祿寺卿。繆昌期正詹事。各廕一子。左光斗右副都御史。魏大中太常寺卿。周朝瑞袁化中劉鐸顧大章俱太僕寺少卿。與高楊祭二壇。造墳安葬。周起元左光斗祭一壇。餘俱照品祭葬。劉顧二太僕亦設一祭。海內快之。

檮杌陳元朗事。似極怪誕。然耳新亦載其事。惟不言姓名耳。其他蹤類云。丁卯春

三月忠賢誕日。公卿臺省。皆稱觴爲壽。忽一道人幅巾布笠。藤杖塵拂。踵門求見。聞者叱曰。幾許元老鉅卿。竟日矜候。未能接見。汝一遊食之徒。便欲見我千歲乎。亟走。免汝責。稍遲。遭亂槌矣。道人曰。魏公我貧賤交。今日覲面一言。爲壽千秋也。聞者不敢報。以瓜椎指其頭顱而詈曰。汝敢狂言無忌。幸今壽日。若他時。當膏此耳。道人以杖叩鼓。衆失色。隨擁之進。稟曰。此道人求見。不應擅自擊鼓。致犯天威。道人長揖厲聲曰。與公久別。今日復得相見於此。公今富貴極矣。寧相忘耶。忠賢大怒曰。妖道何其肆妄。我豈與汝交耶。叱左右縛付鎖撫司嚴究。道人曰。我風鑑一世。閱人多矣。獨不識汝盜賊其形。虎狼其心乎。第欲挽回以全忠臣義士之多命也。一手指天曰。汝能欺君欺人。彼蒼可能欺乎。吾當看汝寸磔。殆狗彘不食汝餘也。汝豈能殺我耶。將身振躍。綁索俱斷。兩袖拂空。清風驟至。舉座咸驚。驚地不見。是魏闡誕日之逢異人。果有其說。作者因託爲故友陳元朗。且稍易其事。謂忠賢善待元朗。元朗不肯留而去。至與元朗同至之老僧。卽曾救忠賢於困厄中者。

則無可考證。意必寓言耳。

又耳新奸恣類云。逆魏恃寵。一日走馬御前。驚地加鞭。騰空飛過。上爲之震恐。親挽玉弓。射殺其馬。魏恬不畏罪。請死。猶作傲色。退有怨言。朝夕提防。介介不釋。又廣置緝事之人。密布天下。丁卯余邑有余生者。偶過渡。遇一京師人同舟。生問魏闢荼毒朝紳。今復何似。其人怒曰。魏尙公舉朝奉爲天生聖人。汝一小書生敢妄詆。何膽大如斗也。時南昌書肆中。有一生閱三朝要典。偶發不平之慨。忽一人攘臂直前。欲挾以見撫院。衆爲解勸。俾生與多金始免。其孽召類云。逆魏縊死阜城店。當時暫行埋掩。後三月發塚。凌遲。身尸未化。及臨刑。似猶有微息。鮮血迸流。若留以待天刑者。時李朝欽亦同縊死。發尸惟骸骨一堆而已。

白蓮教起於薊州人王森。森嘗救一妖狐。狐斷尾令藏之。人聞異香。多歸附。因倡白蓮教。自稱聞香教主。其徒有大小傳頭。及會主諸號。蔓延西北諸省。後森爲有司所得。斃於獄。子好賢。及鉅野徐鴻儒。武邑于宏志輩踵其教。徒益衆。約天啓二

年中秋並起兵。謀洩。鴻儒遂先期反。自號中興福烈帝。稱大成興勝元年。用紅巾爲幟。陷鉅野、鄆城、及鄒、滕、嶧、三縣。山東故不置重兵。巡撫趙彥練民兵。增諸要地。請留京操班軍。及廣東援遼軍。以備征調。薦起故大同總兵官楊壁基統山東軍討賊。賊襲兗州。犯夏鎮韓莊。劫漕艘。皆爲官軍所敗。時賊精銳聚鄒滕間。壁基從副使徐從治計。令游兵綴賊鄒城。而以大軍擊精銳。壁而殲之。嶧山遂圍鄒。賊食盡。其黨出降。鴻儒單騎走。擒之。送京師。磔於市。鴻儒臨刑歎曰。我與王好賢父子經營二十年。徒黨二百萬。事不成。天也。舉事凡七月而滅。史言如是。而檣杪乃歸功於傅應星。謂有空空兒助成其功。皆妄言也。

擲杯記傳奇考

擲杯記爲松郡諸生許令則所撰。令則爲陳眉公高足弟子。能文章。通音律。記中事皆紀實也。按曹千里說夢云。詞林朱文石（名大韶）古玩充牣。獨苦無子。以弟子爲嗣。其夫人平湖陸氏。卽莊簡公（名光祖號五臺官吏部尙書）族女也。文石

歿。而陸之子姓來唁。謂夫人曰。我輩外姓。不敢冀田園。惟聞有玉杯一隻。願以此爲贈。夫人怫然不與。竟恨恨去。後假逋欠冊糧爲詞。訟嗣子於官。囑邏卒伺於中途擒去。曰。杯朝至。夕卽釋矣。不得已而以杯獻。而訟事竟居負局。後朱詠白（名本洽字叔熙）中癸丑進士。此時陸勢亦漸衰矣。詠白乃具疏鳴父冤。而事已久遠。惟以空文了事。開釋原擬之罪。而後焚黃。人咸悲其志焉。壬戌年。郡侯張石梁蒞松。多權略。有妖人馬道人戚泰。永謀不軌。事發被獲。而陸之子鍾奇亦與焉。并禁囹圄。後馬戚二孽駢斬於南演武場。而鍾奇免脫。出獄時。朱僕卽捧之去。必欲得杯。一如前陸之所以挾朱者。不三日而杯至。詠白乃掛其像。設奠。以杯三酬。隨於階前擲碎之。此杯名教子天。母龍一。子龍九。製作精巧。客有拾一片以示余者。熟玩之。堅潔而古色淋漓。希世物也。

說夢言同時有雙直記傳奇。爲山東右藩張七澤之子次璧所作。用以刺閹黨朱太常雲萊者。又有黑白傳小說。則刺董文敏公納同郡陸秀才女綠英也。二書均

觸顯者之怒。致興大獄。以故毀板不傳。惟擲杯記則猶有存者。余友元和鄒君葆孫嘗見之。

鐵冠圖演義考

演義謂有明一代之曆數。鐵冠道人已預知之。爲繪三圖以獻太祖。密藏金匱。迨崇禎將終。啓匱檢閱。則皆繪流賊亂明事。是書引爲緣起。遂名其書爲鐵冠圖云。顧鐵冠道人事。詳吳郡陸粲所著庚巳篇。前考英烈演義已載之。茲復據明史方伎鐵冠本傳云。張中字景華。臨川人。應進士舉不第。放情山水。遇異人授數學。多奇中。太祖下南昌。以鄧愈薦召至。占驗多中。爲人狷介寡合。與之言。稍涉倫理。輒亂以他語。類佯狂玩世者。嘗好戴鐵冠。人稱爲鐵冠子云。合觀兩書。不聞其有繪圖事也。惟楊夢儀高坡異纂云。劉基佐高皇帝定天下。問語及指授壁書之老士。召至闕下。時方議建宮闕。令道士爲圖以進。與誠意伯張鐵冠所圖悉合。是鐵冠雖嘗爲圖。而所紀者乃地理。非曆數也。紀曆數之圖。苦無可考。或編書者藉爲點

綴焉耳。

書叙張李二賊事。皆掠取史鑑。敷衍成書。以致差誤遺漏。先後倒置。殊不足觀。按明史流賊李自成傳云。自成米脂人。世居懷遠堡。李繼遷寨。父守忠。無子。禱於華山。夢神告曰。以破軍星爲若子。己生自成。幼牧羊於邑大姓艾氏。及長。充銀川驛卒。善騎射。鬪很無賴。數犯法。知縣晏子賓捕之。將置諸死。脫去爲屠。演義以捕自成之縣令爲閻法。非也。且自成脫獄後。猶不卽反。而演義乃謂反獄起義。誅縣令一家者亦非。自成傳云。天啓末。陝西撫按皆魏黨。貪黷不詰盜。盜由是始。白水賊王二。府谷賊王嘉允。宜州賊王左掛。飛山虎大紅狼等。一時並起。安塞馬賊高迎祥者。自成舅也。與饑民王大梁聚衆應之。迎祥自稱闖王。是自成妻舅爲高迎祥也。傳又云。洪承疇督關中。遣將追自成至醴泉。賊將高傑通於自成妻邢氏。懼誅。挾之以降承疇。後自成復入陝。孫傳庭死。諸總鎮皆降。傑以竊妻故。走渡宜川。絕蒲津以守。是自成二妻。一高一邢。並無周姓其人也。演義謂娶滿天星周超之妹。

名二姐。皆妄語耳。演義所載賊目。亦多與自或本傳不同。本傳謂有神一元不沾泥。可天飛郝臨菴紅軍友點燈子李老柴混天猴獨行狼諸賊。所在蜂起。或掠秦或東入晉。屠陷城堡。官兵東西奔擊。賊或降或死。旋滅旋熾。又謂崇禎四年。王嘉允爲左右所殺。其黨推王自用號紫金梁者爲魁。自用結羣賊老獍。馬守應。曹操羅汝才。八金剛。掃地王。射塌天。閻正虎。滿天星。破甲錐。邢紅狼。上天龍。蝎子塊。過天星。混世王等。及高迎祥。張獻忠。共三十六營。衆二十餘萬。聚山西。自成乃與兒子過。往從迎祥。與獻忠等合。號闖將。未有名。觀此則格子眼穿。山甲獨頭虎等。皆由作者臆造。而眞名反爲所掩矣。據自成傳。崇禎七年秋七月。孫傳庭禽迎祥於盤屋。獻俘闕下。磔死。於是賊黨共推自成爲闖王。則自成始僅爲迎祥裨將。至迎祥既死。而始襲闖王之名。演義乃謂自成初出。卽稱闖王。而迎祥反爲裨將。誤甚矣。自成爲官兵所困。深入險地。幾瀕於死。而卒得反危爲安者。有二。一在崇禎七年。陳奇瑜總督山陝河南湖廣四川。以湖廣不足憂。引兵西擊。獻忠等奔商維。

自成等陷於興安之車箱峽。會大雨兩月。馬乏芻多死。弓矢皆脫。自成用顧君恩計。賄奇瑜左右詐降。奇瑜許之。檄諸將按兵毋殺。所過州縣。爲具糗傳送。賊甫渡棧。卽大噪。盡屠所過七州縣。而略陽賊數萬亦來會。賊勢愈張。一在十二年。楊嗣昌督師夷陵。圍之於魚腹諸山中。自成大困。欲自經。養子李雙喜勸而止。賊將多出降。劉宗敏者。藍田鍛工也。最驍勇。亦欲降。自成與步入叢祠。顧而歎曰。人言我當爲天子。盍卜之。不吉。斷吾頭以降。宗敏諾。三卜三吉。敏還。殺其兩妻。謂自成曰。吾死從君矣。軍中壯士聞之。亦多殺妻子願從者。自成乃盡焚輜重。輕騎由郟均走河南。河南大旱。饑民從自成者數萬。二事傳載極詳。而演義乃以督師者爲洪承疇。以圍困處爲在松山。不知松山遠在錦州。松山之圍。在明季果有其事。乃清軍之圍洪承疇。非洪承疇之圍闖賊也。作者移東湊西。將差就錯。殊不直識者一笑。宋獻策李巖。牛金星。果有其人。據自成傳云。杞縣舉人李信。逆案尙書李精白子也。嘗出粟賑饑民。民德之。曰李公子活我。會繩伎紅娘子反。擄信。強委身焉。信

逃歸。官以爲賊。囚獄中。紅娘子來救。饑民應之。共出信。盧氏舉人牛金星磨勘被斥。私入自成軍。爲主謀。潛歸。事洩。坐斬。已得末減。二人皆往投自成。自成大喜。改信名曰巖。金星又薦卜者宋獻策。長三尺餘。上識記云。十八子主神器。自成大悅。自成爲人。高顴深頤。鷓目曷鼻。聲如豹。性猜忍。口殺人。斲足剖心爲戲。巖因說曰。取天下以人心爲本。請勿殺人。收天下心。自成從之。屠戮爲減。又散所掠財物賑饑民。受者不辨。雜呼曰。李公子活我。巖復造謠詞曰。迎國王。不納糧。使兒童歌以相煽。從者日衆。左良玉與陳永福同爲總兵。年亦相若。演義以良玉爲閻法之婿。以法爲永福之婿。藉爲貫串。實皆妄言。永福守開封。射自成中。日果有其事。謂射目出自閻法之子玉奇手者亦妄。考史。閻法父子。並無其人。自成傳載十六年西入陝。陷潼關。孫傳庭死。諸總兵皆降。陳永福嘗射中自成。日保山巖不敢下。自成折箭爲誓。招之。亦降。是永福始爲自成勁敵。而終於降賊者。皆實事也。開封久困不下。卒以水灌而敗。事詳白愚所著汴圍濕襟錄。錄誌第三圍掘河淪賊一則云。

圍至七月終。望援無期。坐以待斃。汴人熟知河勢。見往歲黑罡上流遇決。卽自賊營一路而下。適當其要。乃稟巡撫高名衡。差諜者潛渡河北。約巡按嚴雲齊舉事。掘一晝夜。賊覺之。領兵衝散。亦於朱家寨直對北門。挖掘小河一道。引水灌汴。幸未大漲。止引細流至城下。深纔三四尺。隨溢隨落。竟不爲害。反將周城濠河灌平。民得網魚充饑。賊馬步不能近城一步。又全河入汴一則云。賊久困汴。意在必克。不料死拒六匝月。守志更堅。賊恨甚。見陰雨連綿。秋水大漲。乃掘上流。堅塞東西南三面堤口。不令水分四溢。止留北面。使全河入汴。至九月十五日。督賊數萬。將河決開。城居釜底。河流一洩。怒浪巨濤。吼若雷鳴。北門頃刻衝沒。合城男婦哀號。王府上庶。盡升房垣。賊亦亂竄。至夜半。水深數丈。浮屍如魚。哀哉。自成火併曹操。事誠有之。惟計殺賀一龍。非假獻忠手也。按自成本傳云。自成不好酒色。脫粟粗糲。與其下共甘苦。羅汝才（曹操真名）妻妾數十。被服紈綺。帳下女樂數部。厚自奉養。自成嘗嗤鄙之。汝才衆數十萬。用山西舉人吉珪爲謀主。自成善攻。汝才善

戰。兩人相須若左右手。自成兵強士附。有專制心。顧獨忌汝才。乃召汝才所善賀一龍宴縛之。晨以三十騎斬汝才於帳中。悉兼其衆。又汴圍濕襟錄云。賊久無退志。巡撫高名衡偵知曹與闖明密暗疎。乃乘機寫僞書一封。內稱前接將軍密札。已悉轉禍爲福之舉。又見對陣打砲向上。不傷我軍。已見真誠。本院已密札河北兵馬。於八月二十九日子夜。由朱家寨南渡會合。專聽舉行。使諜者潛投曹賊。被闖營兵馬捉獲。搜得書獻闖。信以爲真。後殺曹賊。爲此故也。明季諸將殺賊。以周遇吉爲最。而死事尤烈。事具遇吉本傳。傳云。遇吉好射生。後入行伍。戰輒先登。屢破賊。前後積功至太子少保左都督。十五年。授山西總兵。汰老弱。繕甲仗。練勇敢。一軍特精。明年。自成陷全陝。將犯山西。遇吉以沿河千餘里處處可渡。分兵扼上游。請兵於朝。朝廷遣熊通以二千人來赴。遇吉令防河。時平陽守將陳尙智已遣使迎賊。諷通還鎮說降。遇吉叱之曰。吾受國厚恩。寧從叛逆。且爾不能殺賊。反作說客耶。立斬之。十七年二月。賊陷太原忻州。圍代州。遇吉憑城固守。潛出兵奮擊。

殺賊無算。食盡援絕。退保寧武。賊踵至。大呼五日不降者屠其城。遇吉四面發礮。殺賊萬人。火藥且盡。乃設伏城內。出弱卒誘賊入城。亟下閘。殺數千人。賊用礮攻城。圯復完者再。傷其四驍將。自成懼。欲退。或曰。吾衆百倍於彼。但用十攻一番。蔑不勝矣。從之。官軍力盡。城陷。遇吉巷戰。馬蹶。徒步跳蕩。手格殺數十人。身被矢如蝟。竟爲賊執。大罵不屈。賊懸之高竿。叢射殺之。復燔其肉。士民感遇吉忠義。非戰殺賊。不可勝計。夫人劉氏素勇健。率婦女數十人。據山巔公廨。登屋而射。每一矢斃一賊。賊不敢逼。縱火焚之。自成集衆計曰。寧武雖破。我將士死傷多。此去歷大同陽和宣府居庸。皆有重兵。倘盡如寧武奈何。且還。俟再舉。而大同總兵姜瓖。宣府總兵王承允。降表相繼至。大喜。遂長驅抵居庸。太監杜之秩。總兵唐通。開門延之。京師遂不守矣。福王時。贈遇吉太保。諡忠武。自成既破京師。入殿登御座。見墩下龍爪俱動。殿角又有鬼怪。驚跌座下。事具自成本傳。不盡誣也。傳云。自成升御座。忽見白衣人長數丈。手劍怒視。座下龍爪鬣俱動。自成恐。亟下。及吳三桂

借清兵破賊。自成西奔入陝。復南走湖廣。入羅公山。爲鄉人所殺。亦係實事。第所入者乃九宮山也。自成傳云。順治二年。自成棄西安。由龍駒寨走武岡。人襄陽。復走武昌。爲清兵所迫。部衆多降散。自成走延寧蒲圻。至通城。竄於九宮山。九月。留李過守塞。自率二十騎略食山中。爲村民所困。不能脫。遂縊死。或曰。村民方築堡。見賊少。爭前擊之。自成馬陷泥淖中。腦中鉏死。剝衣得龍衣金印。眇一目。村民乃大驚。謂爲自成也。費宮娥冒公主從賊。刺賊死而已。亦自殺。事固有之。但所刺者非李巖。而巖亦不死於宮娥手也。明史后妃傳附載費娥事云。宮人費氏自投智井。賊鈎之出。見其姿容。爭奪之。費給曰。我長公主也。羣賊不敢逼。擁見自成。自成以賞部將羅某。費給羅曰。我實天潢。義難苟合。宜擇吉成禮。羅喜。置酒極歡。費懷刺刃。俟羅醉。斷其喉。立死。因自詫曰。我一弱女子。殺一賊帥足矣。遂自刎。自成大驚。令收葬之。又自成傳云。平陽李巖。故勸自成以不殺人收人心者也。及陷京師。保護懿安皇后得自盡。獨於士大夫無所拷掠。金星等忌之。陰告自成曰。巖雄武。

有大略。非能久下人者。十八子之讖。得非巖乎。因譖其欲反。自成使金星與巖飲。殺之。今鐵冠圖院本有刺虎一齣。言費所刺者名李虎。均失實矣。

張獻忠事據本傳略云。獻忠延安衛柳樹澗人也。與李白成同歲生。長隸延綏鎮。爲軍。犯法當斬。主將陳洪範奇其狀貌。爲請於總兵官王威。釋之。崇禎三年。陝西賊大起。獻忠以米脂十八寨應之。自號八大王。洪承疇爲總督。獻忠就撫。已而叛。入山西。尋擾河北。又渡河。自是陝西河南湖廣四川江北數千里。皆被蹂躪。屢爲左良玉所敗。宛城之役。良玉前鋒羅岱射之。中額。良玉馬追及。刃拂獻忠面。馬馳。以免。創甚不能戰。會總理熊文燦主撫。獻忠偵知陳洪範隸文燦麾下。因獻重幣請降。處於穀城。尋又叛。十三年。爲良玉追擊。竄歸山中。勢大蹙。遣間說良玉勿攻。因得掩息旗鼓而走。嘗欲渡洞庭湖。卜於神。不吉。投蛟而詢。將渡。風大作。獻忠怒。連巨舟千艘。載婦女焚之。水光夜如晝。旣陷江西。有獻計取吳越者。獻忠憚良玉在不聽。決策入川。破重慶之日。天無雲而雷。賊有震者。獻忠怒。發巨礮與天角。

進陷成都。時清兵已定京師。獻忠遂僭號大西國王。改元大順。卽僞位。以蜀王府爲宮。名成都曰西京。用汪兆麟嚴錫命爲左右丞相。設六部五軍都督府等官。悉陷諸府州縣。據有全蜀。獻忠黃面長身虎額。人號黃虎。性狡譎嗜殺。一日不殺人。輒悒悒不樂。詭開科取士。集於青羊宮。盡殺之。筆墨成丘塚。坑成都民於中園。殺各衛籍軍九十八萬。又遣將分屠各府縣。名草殺。僞官朝會拜伏。呼焚數十下殿。鯁者引出斬之。名天殺。又創生剝皮法。皮未去而先絕者。刑者抵死。將卒以殺人多少叙功。共殺男女六萬萬有奇。賊將有不忍。至縊死者。僞都督張君用等數十人。皆坐殺人少。剝皮死。并屠其家。諸受職者。後亦皆見殺。慘虐無理。不可勝紀。又用法移錦江。涸而掘之。深數丈。埋金寶億萬計。然後決堤放流。名水藏。曰無爲後人有也。川中民盡謀窺西安。率衆出西北。會清兵至漢中。僞將劉進忠降。爲鄉導。至鹽亭。大霧。獻忠曉行。猝遇於鳳凰坡。中矢墜馬。蒲伏積薪下。牽出斬之。自成祖塋確葬龍穴。爲自成祖李海所築。演義謂由宋獻策指授。而自成遂將父

毋活埋。以求速效。皆故甚言之也。後爲米脂令。邊大綬掘毀。亦果有其事。但日成卽僞位後。邊公亦不聞有見捕事也。按任邱邊大綬自著之虎口餘生錄云。余自壬午春伐賊墓。米人洶洶。謂必遭不測禍。余諭之曰。如賊修怨。余一身當之。定不爾累。衆疑信不一。而艾朝棟高映元馮起龍等。實爲賊之姻黨。聞賊行。牌至西安。有四月十九日起馬入秦之語。羣謀俟賊到時。執余暨艾詔黑光正等獻賊。逆謀嘍嘍有據。余欲中聞撫臺。而其巡捕常昌運。與高映元有舊。恐其輿援中阻。因密稟張按臺。不意逆黨在勢要門牆。早爲先容。竟致沉擱。值新按臺金公至。爲余同鄉。逆黨不自安。共謀去余。會部咨甄別賢否。撫臺列余薦劾。按臺又欲題陞城堡廳。逆黨益惴惴懼。值十六年大計。伊探訪余官評稱最。其恨愈深。遂捏造單款。極力傾陷。然終未能大害。止蒙降處。報到之日。米人老幼嗟泣。痛余之去。而余舉家慰快。謂得脫苦海。遠仇讐也。撫按皆諭留候題。余力辭。解任出疆之日。不能爲行李。時長兄順爲山西澤州守。因赴澤。是爲歲之七月初旬。至十月六日。而闖賊破

潼關旋陷西安。州縣皆望風投獻。余十一月自澤歸里。撫指逾歲。賊鋒已逼晉東。會真定叛卒殺撫臺迎賊。固關失守。三路犯神京。遠邇震恐。父兄親戚咸爲余憂。勸遁跡以避。余撫然曰。一身可隱。其如八口何。卽妻孥可捐。孀母何賴。萬一蒙難。吾何以見先人於地下也。況我邊氏子。姓多人。寧忍全一己之生。貽舉家之害乎。吾原爲朝廷滅賊計。今爲社稷死。有餘榮矣。何以避爲。遂違衆意。三月廿一日。驚聞都京已破。萬乘殉國。余聞之。北向慟哭。再拜成服。杜門謝客。以聽天命。餘生錄所言如此。不聞爲闖賊所捕。至滿清入關而始脫也。錄後附有當時塘報。并錄於左。

陝西延安府米脂縣爲塘報事。竊流寇猖獗。李賊尤甚。其本籍實隸米脂。在職所轄境內。茲訪得賊祖李海。父守忠。墳墓並在本縣城西二百里外。相傳營葬時。曾有異人爲之指書。以爲三世後當得極貴。今其言將驗。但地利固有明徵。而天理不容久昧。今若發其冢。剖其棺。斷其龍脈。則賊之滅亡可立待也。又值得本縣民

人李誠、係賊同里。曾爲賊祖贊葬事。若得其人導引。則賊墓可以物色而得。茲有貢生艾詔。其人老成持重。尋訪李誠。便可託伊前往。但職未敢擅便。伏乞制臺俞允。俾得便宜行事。庶幾闖賊可滅。而國恥立雪矣。理合報明。崇禎十四年十二月初五日塘報。奉陝西總督軍門汪喬年手札云。讀來論。足見門下報國熱腸。第須體訪的確。莫使波及無辜。庶天理順而人功亦易成也。他日滅賊。當以門下之功爲首。此復。又塘報再稿云。陝西延安府米脂縣爲塘報事。職自正月初二日。奉制臺密札。隨喚貢生艾詔。面諭機宜。尋訪李誠去訖。至初八日。艾詔同李誠來見。據李誠稱。伊係闖賊里人。曾爲賊祖營葬。今年月已深。不記其祖所葬處。但當日葬時。開土得三空穴。內有黑碗一枚。因填其二穴。用一穴安葬。仍以黑碗點燈置墓內。今但伐有黑碗者。卽賊祖墓也。職隨喚練總黑光正。堡長官王道正。率領箭手三十名。鄉夫六十名。卽刻起身入山。一晝夜行二百餘里。始到其地。名三峯子。時遇大雪深二尺餘。山路陡滑。馬不能進。職下馬步行五六里。至其山。鳥道崎嶇。

久絕人跡。旋開道攀緣而上。又一里許。見窰舍十餘處。牆垣尙存。卽闔賊莊村。再過一山。則其墓也。四面山勢環抱。氣概雄奇。林木叢雜。不下千餘。大小墓二十三座。伐五六塚。其骨皆血色油潤。不似遠年枯朽。亦皆無黑碗蹤跡。值晚。難以下山。遂坐賊舊窰中向火。至天明。再掘數塚。而黑碗見。卽李海也。骨黑如墨。額生白毛六七寸許。其左側稍下一冢。是李守忠墓。頂上長榆樹一株。其粗如臂。用斧斬之。榆斷墓開。中盤白蛇一條。長一尺二寸。頭角嶄然。隨卽裝入於黑光正袋中。伐其骨骸。凡骨節間。皆綠如銅青。生黃毛五六寸許。其餘骨骸有毛者七八冢。盡數伐掘。聚火燒化。大小林木千餘株。悉行砍伐。斷其山脈。賊墓已破。王氣已洩。賊勢當自敗矣。其黑碗白蛇。呈驗軍門。理合報明。崇禎十五年正月十四日塘報。汪制臺再札云。接來札。知闔墓已伐。可以制賊死命。他日成功。定首叙以酬。草覆。

桃花扇傳奇考

桃花扇傳奇爲云亭山人孔氏所著。書成後。自誌其本末云。族兄方訓公。崇禎末

爲南部曹。予舅秦光儀先生。其姻婭也。避亂依之。羈旅三載。得弘光遺事甚悉。旋里後。數爲予言之。證以諸家稗記。無弗同者。蓋實錄也。獨香姬面血濺扇。楊龍友以畫筆點之。此則龍友小史言於方訓公者。雖不見諸別籍。其事則新奇可傳。桃花扇劇。感此而作者也。又云。作桃花扇時。吳人王壽熙者。丁繼之友也。赴紅蘭主人招。留滯京師。朝夕過從。示余以曲本套數。爲時優熟解者。遂依譜填之。又云。顧子天石讀余桃花扇。引而申之。改爲南桃花扇。令生旦當場團圓。以快觀者之目。詞華精警。追步臨川。補余不逮。余敢不避席乎。今坊間祇有云亭之作。而南桃花扇不多見。蓋小說收束。最忌團圓。如讀西廂者。至崔張花燭一回。更有何趣味也。是書已有先我而考之者。第僅誌其所由來之書目。以便讀者查閱。至各書事實。未嘗臚而列之也。茲爲錄其書目如左。(侯朝宗壯悔堂集十一篇)爲司徒公與寧南侯書。癸未去金陵與阮光錄書。答田中丞書。贈陳郎序。書周仲馭集後。祭吳次尾文。金陵題畫扇。寄寧南小侯夢庚。燕子磯送吳次尾。秦淮春興。哀史閣部。哀

吳次尾（賈靜子四憶堂詩註十二條）九日雨花臺別賀督部贈張尙書田中聞新參相公口號。甲申渡京口。燕子磯送吳次尾。海陵署中。我昔詩寄揚州賀督部。寄寧南侯。哀史閣部。哀吳次尾。又賈靜子侯公子傳一篇。（錢牧齋有學集十一首）題丁家河房亭子。題金陵丁老畫像。丁繼之七十壽。題楊龍友畫閣。贈張燕筑。左寧南畫像爲柳敬亭題。留丁家水閣絕句。贈侯商邱。金陵雜題絕句。丁老行送繼之。爲柳敬亭募葬引。（吳梅村集七首）聽女道士卞玉京彈琴歌。贈陽羨陳定生。贈寇白門。楚兩生行并序。冒辟疆壽序。柳敬亭傳。柳敬亭像贊。又梅村綏寇紀略一卷。（冒辟疆同人集二篇）得全堂夜讌記。得全堂夜讌後記。（沈眉生姑山草堂集四篇）劾楊武陵疏。書陳定生遺像。楊維斗稿序。答劉宗伯書。（陳其年湖海樓集三篇）冒辟疆壽序。左寧南與柳敬亭說劍圖序。哭侯朝宗。（龔孝升定山堂集十三則）張瑤星招集松風閣。沈眉生姑山草堂歌。贈方密之序。懷方密之詩八首。壽張燕筑。題丁繼之秦淮水閣。清河道上丁繼之送別卽席口號。

口號四首贈阮懷寧歌者朱音仙。贈柳叟敬亭限韻。九日邀諸君張燕筑丁繼之度曲。爲趙友沂題楊龍友畫冊。賀新郎詞贈柳敬亭。流園春詞贈柳叟敬亭。

以上諸集。苦予誦陋。強半未獲一見。茲姑就劇中角色。一一考之。差幸十得七八。一二缺漏。容俟訪諸博雅君子以補之也。按平江李次青先正事略。侯朝宗傳云。明啓禎間。才俊雄傑之士。身不在位。奮然以東都清議自持者。曰四公子。四公子者。桐城方以智。密之。如臯。冒襄。辟疆。宜興陳貞慧。定生。及商邱侯方域。朝宗也。朝宗先生尤以文章著。祖執蒲。官太常卿。父恂。戶部尙書。皆以東林忤闈黨。先後除名。幼從父官京師。習知中朝事。而於君子小人門戶。始終之。懷寧阮大鍼。故魏闈義兒也。屏居金陵。謀復用。諸名士共檄大鍼罪。作留都防亂揭。定生及貴池吳應箕。次尾主之。大鍼愧且悲。然無可如何。知先生與二人者相善也。私念因侯生以交於二人。事當已。乃屬其客來交。權先生覺之。謝客勿與通。而大鍼家有伶一部。能歌所演劇。號燕子箋者。會諸名士以試事集金陵。先生置酒高會。徵阮伶。大鍼

心竊喜。立遣伶往。而令他奴詞之。方奏曲。四座稱善。奴走告。大鍼心益喜。已而抗聲論天下事。語稍及大鍼。遂戟指罵詈不絕。大鍼乃大怒。而恨三人者尤次骨。甲申、南都擁立。大鍼驟枋用。興大獄。將盡殺黨人。捕定生入獄。次尾亡命。先生夜出走。渡揚子。依鎮帥高傑得免。先生既負才不試。以明經累舉於鄉。輒報罷。順治辛卯。列副榜。初放意聲伎。已而悔之。發憤爲詩古文。倡韓歐學於舉世。不爲之日。順治十一年卒。年三十有七。又吳梅村綏寇紀略云。阮大鍼本縱橫才。以奄黨故廢歸。德侯方域嘗偕其友。移書罵之。方域侍郎恂次子也。當左兵南潰。方域僑居陪都。大鍼揚言良玉爲賊。目侯同反。幾及於禍。傳奇謂侯生參高傑軍。高傑見殺。師潰。南旋。適罹大獄。與先正事略少異。蓋亦有故。據梅村文集冒辟疆壽序云。有皖人者流寓南中。故奄黨也。(指懷寧)通賓客。蓄聲伎。欲以氣力傾東南。知諸君子唾棄之也。乞好謁以輸平。未有問。會諸公子置酒雞鳴埭下。召其家善謳者。歌主人所製新記。則大喜曰。此諸君欲善我也。既而偵客云何。見諸君箕踞而嬉。聽其

曲時亦稱善。夜將半，酒酣，輒衆中大罵曰：「若奄兒媼子，乃欲以詞家自贖乎？引滿泛白，撫掌狂笑，達旦不少休。於是大恨次骨，思有以報之。甲申之亂，彼以攀附騾枋用，興大獄，修舊郟，定生爲所得，幾壞牢戶。朝宗遁之故郟山中，南中人多爲辟疆耳目者，跳而免。梅村與侯生同時，所誌當確。顧兩說均不言侯生入獄，而傳奇乃謂四公子同入獄中，與柳敬亭相遇，考敬亭亦未嘗入獄，此由作者藉爲貫串，非紀實也。」

防亂公揭，實由無錫顧子方首倡，而傳奇獨闕，以不在四公子列，故略之也。陳維崧先府君行略云：「戊寅歲，留都防亂，公揭之事起，公揭者，爲懷寧阮大鍼發也。」（中略）貴池吳先生次尾時主予家，會無錫顧子方先生來，三人者，意相合也。吳先生隨於燈下草一揭，顧先生首倡，而府君次之，諸清流又次之，揭未布，或泄之懷寧，懷寧大恨，未幾而有甲申之難。宏光帝立，府君蒲伏闕下，爲先少保請諡，時懷寧貴用事，已捕周鹿溪先生，繫之請室。（卽周鏞）先生亦以揭故，爲懷寧所切

齒者也。九月十四日，有白靴校尉至邸中，縛府君至鎮撫，出一紙，紙尾有貴池吳先生名。先生先一日亡去。劉僑者，故思宗皇帝時舊錦衣也。夜漏三下，以一小赫甌與鎮撫馮可宗。大約謂東林後人，無故殺之。紀綱門達之事可鑒也。馮獲書意動。司馬練國公（史可法）亦爲府君星馳詣貴陽（馬士英）相國王公鐸亦致書鎮撫。獄遂解。明年，鹿溪先生死獄中。是入獄確祇定生一人。傳奇乃謂陳吳侯三人在蔡益所書坊，同時被捕。故錦衣張瑤星爲之辭職。三人在獄，親見周雷二公之被刑，以此證之。知傳奇稍有增損。且蔡益所亦無可考也。

陳維崧婦人傳云：李姬名香，秣陵教坊女也。母曰貞麗，有俠氣。嘗一夜博輸千金，立盡。姬亦俠而慧，略知書，能辨別士大夫賢否。張學士溥、夏吏部允彝，尤亟稱之。十三歲，從吳人周如松受歌。盡得其音節，然不輕發也。故開府田仰嘗以金三百鎰，邀姬一見。開府向兒事魏闈者。又姬嘗以他事獲罪阮懷寧。至是喟然歎曰：田公寧異於阮公乎。峻却之。卒不往。與歸德侯方域善，以身許之。設誓最苦。誓辭今

尙存湖海樓篋衍中。又余懷板橋雜記云。李香身軀短小。膚理玉色。慧俊婉轉。調笑無雙。人名之爲香扇墜。余贈詩云。生小傾城是李香。懷中婀娜袖中藏。何緣十二巫峯女。夢裏偏來見楚王。武塘魏子中爲書於粉壁。貴陽楊龍友寫崇蘭詭石於左偏。時人稱爲三絕。由是香之名盛於南曲。四方才士。爭一識面爲榮。板橋雜記又云。寇湄字白門。娟娟靜美。跌宕風流。能度曲。善畫蘭。粗知拈韻。保國公購之以貯金屋。京師陷。保國公降。家口沒入官。白門以千金贖身。從一婢而歸。築園亭。結賓客。日與文人往還。卜賽。一日賽賽。後爲女道士。自稱玉京道人。知書。工小楷。善畫蘭鼓琴。年十八。遊吳門。居虎邱。尋歸秦淮。見客初不甚酬對。若遇佳賓。則諧謔間作。一座傾倒。歸東中。一諸侯。不滿意。進婢當夕。乞身下髮。後依良醫鄭保御。築別館以居。長齋繡佛。刺舌血。寫法華經以報鄭。卒葬惠山。祇陀菴錦樹林。雜記於鄭妥娘事無所誌。惟載錢牧齋金陵雜題一絕云。舊曲新詩壓教坊。縷衣垂白感湖湘。閒開閨集教孫女。身是前朝鄭妥娘。註鄭女英小名妥娘。詩載列朝詩選。

閩集中。是安娘詩妓也。傳奇乃以丑脚描其醜態。稍嫌未稱。

柳敬亭蘇崑生與吳梅村善。梅村爲作柳敬亭傳云。敬亭揚之泰州人。蓋曹姓。年十五。獷悍無賴。名已在捕中。走之盱眙。困甚。挾稗官一冊。非所習也。耳剽久。妄以其意。抵掌盱眙市。則已傾其市人。久之。過江。休大柳下。攀條泫然。已撫其樹。顧同行數十人曰。噫。我今氏柳矣。後二十年。金陵有善談論柳生所到皆驚。有識者曰。此固嚮年過江時休柳下者也。又楚兩生歌序云。蔡州蘇崑生。維揚柳敬亭。其地皆楚分也。而又客於楚。左寧南駐武昌。柳以談。蘇以歌。爲幸舍重客。寧南沒於九江舟中。百萬衆皆奔潰。柳已先期東下。蘇生痛哭。削髮入九華山。久之。出從武林汪然明。然明亡之吳中。落落難合。到海濱。寓吾里蕭寺。以余與柳生有雅。爲立小傳。援之以請曰。吾浪迹三十年。爲通侯所知。今失路顛顛。而來過此。惟願公一言。與柳生並傳足矣。余懷板橋雜記云。敬亭善說書。遊金陵。吳橋范司馬。桐城何相國。引爲上客。常往來南曲。與張燕筑沈公憲俱。張沈以歌曲。敬亭以談詞。酒酣以

往。擊節悲吟。傾廡四座。蓋優孟東方曼倩之流也。入左寧南幕府。寧南敗。遊松江。馬提督軍中。鬱鬱不得志。年已八十餘矣。間遇余。僑寓宜睡軒中。猶說秦叔寶見姑娘也。雜記又云。曲中狎客。有張卯官笛。張魁官簫。管五官管。吳章甫絃索。盛仲文打十番鼓。丁繼之張燕筑。沈元甫王公遠。宋維章串戲。柳敬亭說書。或集。二李家。或集眉樓。每集必費百金。此亦銷金窟也。沈公憲與沈元甫。不知是一是二。俟訪諸博雅者。

南曲盒子會。沈周嘗爲作詩序云。南京舊院有色藝俱優者。或二三十姓。結爲手帕姊妹。每上節。以春藥巧具。殼核相賽。名盒子會。凡得奇品爲勝。席間設燈張樂。各出其技能。賦此以識京城樂事也。所賦七古一首。從略不錄。

徐中山子孫。國變後降爲皂隸。傳奇所述。猶不盡然。以予考之。其境更苦於是。雖欲爲皂隸。猶不得也。板橋雜記云。中山公子徐青君。家貲鉅萬。廣蓄姬妾。造園大功坊側。每當夏月。置酒河房。夜以繼日。綸巾鶴氅。真神仙中人也。乙酉鼎革。籍沒

田產。一身子然。與丐爲伍。乃至爲人代杖。一日與當刑人約定杖數。計償若干。受杖時。其數過倍。大呼曰。吾徐青君也。兵憲林公駭問左右。有哀王孫者跪而對曰。此魏國公公子徐青君也。窮苦爲人代杖。此堂乃其家廳。不覺傷心呼號耳。林憐而釋之。慰藉甚至。且曰。君有非欽產可清還者。本道當爲查給。青君跪謝曰。花園某白造。非欽產也。林卽查還其園。賣花石柱礎以自活。曹千里說夢。亦誌其事云。余丁丑入都。值徐澹寧掌衛事。澹寧雖忠厚長者。而衙門嚴重。旂尉赫奕。見者不寒而慄。乞休後。以聲伎自娛。可謂全福矣。沒後。諸子陵替。第七子無以資生。爲人代杖。適唐子宋有公事未了。僱此子受杖二十。袁丹叔大不平。謂余曰。子宋不過有錢。如何令七官受扑。余曰。此事必徐七官自願爲之耳。丹老曰。雖如此。寧僱別人。噫。父爲大金吾。撻人多矣。天或以此償債。亦未可知。

史可法馬士英黃德功高傑劉良佐劉澤清左良玉等。明史有傳。茲勿贅述。張瑤星乃金陵遺民。非故錦衣也。王漁洋香祖筆記云。張遺字瑤星。金陵遺民也。居棲

霞一小菴。數十年不入城市。著書十餘種。有一書紀南渡時事。可裨史乘。惜未版行。凡所撰著。稱白雲自怡。與先兄西樵相友善。予在邗江。數客金陵。未及見之。蓋已禁足躡山矣。年九十而終。傳奇借棲霞一菴。爲劇中諸人歸束。於文法則佳矣。而按之事實則非也。傳奇作張薇。與筆記稍異。畫工藍田叔莫考。

婦人傳板橋雜記。皆不言李香入宮事。而香自後宮私寄侯公子書。則膾炙人口久矣。不知果出香手。抑好事者代爲捉刀也。此則非予所知。姑錄於左。以供衆覽。

李香君在南都後宮私寄侯公子書

落花無主。妾所深悲。飛絮依人。妾所深恥。自君遠赴汴梁。屈指流光。梅開二度矣。日與母氏相依。未下胡梯一步。方冀重來崔護。人面相逢。前度劉郎。天台再到。而乃音乖黃犬。卜殘燈畔金錢。信杳青鸞。盼斷天邊明月。已焉哉。悲莫悲於生別離。妾之處境。亦如李後主所云。終日以眼淚洗而已。比聞燕京戒嚴。君后下殿。龍友偶來過訪。妾探詢音耗。渠惟望北涕零。噤無一語。嗚

呼。花殘月缺。望夫方深化石之嗟。地坼天崩。神州忽抱陸沉之痛。由甲申迄乙酉。此數月中。烽煙蔽日。鼙鼓震空。南都君臣。遭此奇變。意必存包胥哭楚之心。子房復韓之志。臥薪嘗膽。敵愾同仇。不謂正位以後。馬入閣。阮巡江。虎狼雜進。貓鼠同眠。翻三朝之舊案。黨禍重興。投一網於諸賢。蔓抄殆徧。而以却險夙恨。幾蹈飛災。所幸龍友一力斡旋。方免欽提勘問。然猶逼充樂部。供奉掖庭。奏新聲於玉樹。春風歌燕子之箋。叶雅調於紅牙。夜月譜春燈之曲。嗟嗟。天子無愁。相臣有度。此妾言之而傷心。公子聞之而疾首者也。雖然。我躬不閱。遑恤其他。覩星河之耿耿。永巷如年。聽鐘鼓之遲遲。良宵未曙。花眞獨活。何時再鬪芳菲。草是寄生。惟有相依彤影。乃有蘇髯幼弟。(崑生)柳老疎宗。(敬亭)同爲菊部之儔。共隸梨園之隊。哀妾無告。憫妾可憐。願傳紅葉之書。慨作黃衫之客。噫。佳人雖屬沙吒利。義士今逢古押衙。患難知己。妾眞感激涕零矣。遠望中州。神飛左右。未裁素紙。若有千言。及拂紅箋。竟無一

字回轉柔腸。寸寸欲折。附寄素扇香囊。并玉玦金鈿各一。吁。桃花豔褪血痕。豈化麝脂。豆蔻香銷。手澤尙含蘭麝。妾之志固如玉玦。未卜公子之志。能似金鈿否也。宏光元年二月香手緘。